



JANUARY 2025

VOLUME 65 | NO. 01

Christian Thukizakna



EBC KUM THUPI 2025

I Lampite Enchian Ni

◆ Kahlate 3:40 ◆

01 KUMTHAK NI

19 NIPI SKUL PATNI

26 REPUBLIC DAY

EDITORIAL BOARD

Editor

Rev. Dr. S. Vung Minthang

Managing Editor

Rev. Thawndouliau

Contributing Editors

Rev. K. Kamchinkhup

Rev. Nenglian Vualnam

Production Managers

Rev. V. Thangkhanmuan

Upa T. Paukhansiam

Mr. Mangthianlal Samte

Circulation Manager

Upa K. Jamchinthang

C/No. +91 8837208598

Design & Setting

Upa Khuplajem Guite

LAKMAN:

Kum khat ₹ 150.00

Dak ah ₹ 200.00

Bu khat ₹ 15.00

CONTENTS

1. EDITORIAL	: 01
2. KUM THAK AH MI THAK HIH NA SAWM DIAM?	: 03
3. I LAMPITE ENCHAIN NI	: 06
4. SAPTUAM KEPNA: I LAMPITE ENCHIAN NI	: 08
5. JABOK LUIGAL I KAIDING UH AW!	: 11
6. BIBLE STUDY	: 14
7. GAMMIAL AW	: 19
8. DORCAS CORNER	: 23
9. YOUTH CORNER	: 25
10. CHILDREN'S CORNER	: 27
11. MUSIC CORNER	: 28
12. EBC INNSUNG THU	: 30
13. THU TUAMTUAM	: 32
14. ORDAIN SUNNA	: 33
15. EBC KUM THUPI KHENNENNA	: 37
16. KIPAHTHU GENNA/ THUMNA DINGTE	: 38

Thusuah ding piakna:

Editor,
Khristian Thukizakna
Dorcias Hall, P. O. Box - 6,
New Lamka,
Manipur - 795006, India.

*Thusuah sung-a kigente
Evangelical Baptist Convention
Saptuam ngaihndan a hikim kholkei.
Thusuahte'n amau thusuah ah moh a
pawtek ding uh.*

I LAMPITE UH ZONG A ETCHET DING KISAM HI

Khristian Thukizakna simtute na vek un kumthak 2025 chibai ka hon buk hi. I mang a mat dia leng i deihlough buaina huaisetak i tuak a, inn-le-lou, neih-le-lam leh hinna manpha tampi i mansuah nung a kumthak i muh maizen Toupa eidi'n hoih na e! chiin Toupa min i phat hi. Huchih laiin tampite khosakna nidang bang thei nawnlou, mikhual dan a om nilouh lah lemlou, ki khotualsak luat di lah lem khinlou, thamlou in tampite zotna ding neilou a relief camp a omdenlai leng i om uhi. Taksa damlou chih kia hilou, lungsim lam, emotional, psychological, leh nekzonna lama angei bang thei nawnlou tampi i omlai uhi. Hiai i buainate behlap ding in akul hetlou ei sung ah kituahlouhna nasatak hong om a polam melma toh sunglam melma toh buai petmah in ibuai uhi. Upate'n "Akta mangkuan kitu" a chih uh i bang mahmah uhi.

Hichibang bilbial khovel ah Toupa'n hun thak hon penawn ahieh bang chizat ding i hia chih i ngaihtuah akul petmah hi. Khristian khat na hih a gingu diktak na hih leh hiai ah tukum a kalsuanna ding a mahni ki-etchetna ding tamlou i taklang hi, ana en mah in:

Pathian toh tonkhawm in: Khovel bangchiteng in buai mahleh nang na kivenbit nak leh na khovel bitlai ahi. Pathian toh na kizopna thildang teng sanga poimoh zaw ahi. Pathian toh kithuahna ding hun sehtuam khat niteng in bawl inla, ahiehtheih liai leh Pathian toh kimuhna ding appointment na bawl bangmah suksiat ding phal ken. Thumna kia ngetna kia hilou Pathian toh hinna sungnung zaw a kithuah mi hih sawm gige in. Tuabanga Pathian toh kithuahte'n khovel azou uhi (Sam 73:28; Jak 4:8).

Nang mah kivelchian masa in: Na insung Toupa Lalgam ahieh keileh setan lalgam hiding hi, Khrist leh Diabol in vaihawmkhawm theilou ahi uhi. Midangte na buaipah ma in nang kivel masa in; na kampau, na lungput, mi mohsakna, mahni dik kisakna, kingaihniai theihlouhna, thuaktheihna taksapna, hiaite na neih leh nang leh nang kibawl masa phot in. Insung subuaitu 'insung vei' kichite pawl kihi nuam mahmah hi. Mi khenkhat gendan in;

'biakin a an ngawl a thumthumte insung a thuakhakte' achiuh bang ki-omthei thou ahi. Kituakloupit kituak dan a kilembawlna sawm leh natna hoihlou vei mi theihlauh dia ki-im toh kibang na hi. Khosakna ngaihtuah luat ziaak a zingkhang apan khomial tantan bazar a omsek na hih leh na insung leng bazar chikhat ana suak a melma setan insung a ana bazar khak ding lauhhuai ahi. Nangmah mit ah pil kenla Toupa kihta zaw in. "Mipil in hoihlou amu a, abu hi," "mihing adia lampi dik a kilawm...huai tawpna sihna lampite ahi" (Pau14:12; 16:25; 27:12).

Na insung velchian in: Tate kepna ah kum 10 aphakma teitei un aletchiang ua om dingdan na deihte zuihpil ngeingei in; thumna, Bible simna, insung kihoulim, chihte apoimoh mahmah hi. Tate kem manlou zen a thildanga buaiden na hihleh na lampi enchain in; tunung chiah na khitui luanna ding ahikha ding! Na insung ah na tate paudik a pau ding in sinsak in. Tulaia kholaka pau diklou simsim hong kithangte nu-le-pate loh sapna khat ahipah hi. Insung a i tate kampau hoih leh pau dik sinsak ngeingei ding ahi. Tulaia pau diklou hong tam i chihte nu-le-pate' sinsakna taksap ziaak ahi. Na tate naungek pau in houpil kenla piching pau in houpil pah zaw in.

Na khosak dan en thak in: Mihing i hihman in khosak tawpsan chih om theilou hi. Gamlak zu-le-vate'n leng nek zon dingdan training hiam seminar chihte neikey mahle uh Pathan piak pianken a pilna aneih uh zang in nekding koi ah om ding hiam chih a zongsiam mahmah uhi. I gam in gah asuan dan zanlam in heutute singtang lam khualzin in ahon gen uh, buh tinkhat mun a buh tin 200 val la uh chih khawng thillam dang bang phial ahi. Gam hichi tuka hoih a teng hang a zawn chihtak a i zawn leh eilam leng kivelna ding om hikha ding ahi. Bill Gate in "mizawng a na pian khiak leh nang hihkhelh ahi kei hi. Himahleh mi zawng a na sih leh nang hihkhelh ahi" chi hi. Mithadah, zongzaw, diktatlou, zuau genhatte a ding in khosak haksa semsem ding hi. Aneizou zodeuhte'n leng aneiloute kankuahdan siam kisin semsem ni. I hindan luite uh, thadahna leh zawntatna neikha i hih le leng kivelthak in, ginomna leh nunnemna khawng ngaisang mahmah ni. Toupa lam ah kik in, Amah deihdan lampi ah paichiat sawm ni. Simtu it, kumthak 2025 nang leh na inkuante a dia vualzawl na kum hong hi hen. ■

KUM THAK AH MI THAK HIH NA SAWM DIAM?

- Rev Dr. S Vung Minthang, General Secretary, EBC

I lampite zong in enchian ni, Toupa lam ah kikhawn ni (Kahlate 3:40)

Thupatna: Jeremiah in hiai thu a genlai Babilon in Judah a hong dou a sal dia a hong mat lai BC 597 vel ahi. Babilonte'n Israel hong dou in khopite a hihsevek ua mipite sal in a pi ua, mi tamlou chikte kia a nusia uhi. Khopi meiin kang sia, nidang a khopi etlawm mahmah kilawmna bei suak ta, kipahna aw zak ding omnawnlou in a dai zikzik hi. Tuahun tuh Jeremiah muhdan in Pathian hehna in Zion tanu meipi bang in khuh zou vek hi (Kah 2:1). Alangkhat ah hichu tuk in kisegawp mahle uh sabei lou a tamlou omlai sunsunte a etchiang in Toupa zahngaihna om lai ahi chih leng a mu zel hi. Tuabang kawm kal ah damnawna ding in mahni hindan dikloute kivelpha a Toupa kiang a kisik a kikhawn ding a lampi omsun ahi chiin kahtam a lou hi.

Hamsiat a om khovel ah haksatna abei ngeikei ding hi. Haksatna pumpelh na sawm luat leh pilvang in haksatna khukupi manoh hikha thei na hi. Khovel a mipil mahmah Aristotle leh Saint Thomas Aquinaste'n, "haksa thuakna kichi hoih leng ahikei a sia leng ahikei - neutral ahi", achi uhi. Huai omdan bel haksatna kichi nang lakdan a kinga ahi, atom in haksatna in ahoih zawsem in a hon bawl thei a na lakdan zil in kha velvul

in a hon bawl thei (better or bitter) achi uhi. Israelte'n nampumpi a haksatna atuah lai un hichibang thil haksa i thuak uh bang ziaak hiding ahia chi a amau kivelthak a, Pathian maia kingaineu a kisik lou in Pathian tung ah a phun zosop uhi (3:39). Hiai buaina Jeremiah in a maituah dan en zual leng:

Khatna ah: Jeremiah in hiai nam pumpi siatgawpna nuam asa tuankei a thuakna

mahmah a “ka dou zohlouhte khut ah Toupa’n kei a honpia hi” chi hi (Kah 1:14; 3:5). **Nihna ah:** Jeremiah in hiai tuah sia politics thil hiam, chibing-naming hiam in a en kei a, Babilonte muhdahna leh huatna a neikei hi. Tua naksang in khalam mit in a en a Pathian muhdan in a mu zaw hi. Hichiin achi hi “nakpitakin Jerusalem in thil a hihkhial” chiin (1:8). Babilonte hilou maw thil hihkhial a chih theih hi, ahia, Jeremiah in amuh tuh aziak om ahi chih ahi. Aziak in Pathian kalh a gamtatna ‘khelhna’ himai ahi.

Jeremiah in Israel gamsung leh inkuansung kisiat dan hichi bang in agen hi. “Sehalte nangawn in a nawi uh asuah ua ata tuailaite uh a tepsak uh” himahleh Israel nute banga chi uhiam chih a genna ah a gitlouhdan uh Sehalte le tuklou, gamdai Ostrits le tuklou “nawiteplai naupang lei dangtak ziakin a dangtawng ah abelh” chi hi (Kah 4:3,4). **Thumna ah:** Hiai thil mulkimhuai gamdang mi tatsiate’n Israel tung a ahiah uh hilou in Pathian thangpaihna Israel tung a hong tung ahi chih mu ahiman in “Toupa

melma bang a honghi a (become like an enemy), Israel a nawmvalh vek” chi hi (2:5). Huaiziakin, Israel tuh minsiat theihtawp in aminsia hi. **Lina ah:** Tuabang kawmkal ah Jeremiah kingaise gawp a, lametna beiin aom keia Toupa a zong a Toupa mel a et chiangin hiai hon thei khia hi. Toupa chitnate ziaka hawi a omlai a hihdan hon phawk khia Toupa ka tantuan ahi chiin kikou khia hi (3:22-24). **Ngana ah:** Jeremiah in Israel damna ding leh suahtakna ding zaw Toupa kianga kiknawn ahi chih mu hi. Israelte suahtakna ding sepaih tampi leh galvan thupite hilou in Toupa chitna leh lainatna ahi zaw, chi hi.

Toupa kianga kikna ding a Israel in ahiah masak ding Jeremiah in thilnih a hon gen hi, huai tuh “I lampite zong in enchian ni” chih ahi (Kah 3:40). Hiai thumal “zong” chih leh “enchian” chihte Toupa kianga kik nuamte’n a hih masak teitei ding uh ahi. Jeremiah in a zat masak thumal “zong” kichi misiamte’ gendan in thil khat a omna mun kitheilou mukhiak sawm a zong genna ahi, hiai

thumal mah Sam 64:6 ah leng kizang hi. Huan thumal nihna “enchian” kichi apaubul ah thilmang zong genna hilou in, tua thil kimu pen bang ahi hiam chih suichetna genna ahi. Amasa pen koi a om ahia chi a (a omna location, position, address kitheilou a zong) genna ahi. Anihna pen aomna mun theita himahleh huai thil pen bang ahi peuhmah hiam chi a suichetna (examine, investigate) genna ahi chiin misiamte’n gen uhi.

Jeremiah in agen hiai ahi gam leh nam damna ding zaw Toupa kianga kikhawn ahi, tua ding in adiklou pen bang ahia, koimun diklou ahia, bangziaka diklou ahia, bangchik apan diklou ahia chihthe mukhiak alou theilou ahi a chihna ahi. Taksa tung natna khenkhat amun kithei chian mahmah hinapi, bang natna ahia, bang ziaka na ahia chihthe kithei hetlou ahihbang in khelhna kimuhna kichi mihing sungnung pen a kimuhchetna kul hi. Khelhna kisuina pen mimal tek kisui ding ahihdan genna in Jeremiah in first person plural pronoun “I” chih zang hi. Mihingte’n i siam mahmah

bel midangte diklouna muhsak ahi a, ei diklouna munuamlou ngen ihi uhi. Huaiziakin, Kha Siangthou in hon kimuhchetsak akul hi.

Tulaia gamsung buaina hiin mimal leh inkuan sung buainate hitaleh, midangte sulou a eimah mimal kizong a kienchian dia sapna hiai ah imu hi. Tulai i buaina leng mihing lam ah en leng phaizang mite ziak ahi ichi ding hi, tunglam en leng bel Khristian kichi eite khawng ziak hizaw maithei ahi.

I thumna tampite uah “Toupa separate administration hon pia in” i chi ua, himahleh Pathian in khelhna apan kivaihawmna tuam (separate administration from sin) hon phut den ahi. Na omdan uh bawlhoh un chih Toupa’n Israel kianga a ngiat a ngaihsakloun ziaka tua siatna maituah uh ahi (Jer 7:3,5; 18:11; 26:13). Tuni’n leng i dam taktakna ding zaw khelhna kimukhia a Toupa kianga a kikhawn louh ngal adang a om kei hi. Kimuhdahna leh kihuatna toh gamtuam nei mah leng anuam tuan kei ding hi. Hiai hun thak kumthak ah i lampite zong in enchian ni, Toupa lam ah kikhawn ni aw. ■

I LAMPITE ENCHIAN NI

- Rev Nenglian Vualnam, *Director Development*

Toupa'n kum thak 2025 ah a hon pikai a i kipak mahmah hi. Khenkhatte a di'n kumlui khiaklah huai pi ahi kha ding a, himahleh, tamtakte' adi'n bel haksatna leh buaina kum ahi ding. Lohsap kum leh mangbat kum leng ahi kha mai thei. Huchih lai in, La phuaktu'n, "Ka khitui nang hon sawl hi hen" a chih bang in haksatna leh buaina i tuahte Toupa' theihpih ahih a, huaite'n Toupa' kiang hon naihsak ahiehleh buaina manpha leh haksatna manpha suak thei lailai hi.

Kum paisa sung in bang chibang lampi na tawn kha himahle hang tu'n bel lametna khat a omlai hi. Pathian i naih sem theihna ding a kum thak leh hun thak piak a om i hi uhi. Toupa'n deihna khat nei a kum thak mel hon musak ahi ngei ding. Ahiehleh, huai Pathian deihlam bangchi'n i theithei dia? Ahiehkeileh, bangchi'n Toupa i naih semsem thei dia? Pathian deihlam i theihtheihna ding in, leh Toupa i naihsam theihna ding in tu kum thupi "I Lampite Enchian Ni" chih ah i kibulpat poimoh masa hi.

Hiai thupi "I lampite enchian ni" (Kah. 3:40) kichi hoihtak in sim lechin hih ding thil poimoh mahmah khat a hon genpah hi. Huai tuh enchian chih thumal ahi. Bang eita etchet

ding? Hoihtak a etchet ding tuh "I lampite" ahi achi hi. Hiai thumal poimoh nihte saulou in sutkhawm i sawm ding.

1. 'Enchian' kichi bang genna ahia? 'Enchian' kichi (Hb. Chaqar= search, seek, found out, try) ahiehleh sui, zong, dap, enkhaia, chihte genkha thei thumal ahi a, hiai mun ah thil khatpeuh a dinmun leh omdan diktak theihkhiak sawm a velchetna, etkhiakna genna thumal ahi. Jawlnei Jeremia in lamdang asak thu khat hiai ahi. Bangchi dan a mi'n a khelhna ziak a gawt a omlai a phun mawk ahia, a lampite zong in enchian hileh athuak tak mah hizaw lou ding hiam, chih ahi. Hichi'n a hon gen hi, "Bangziak a mihing, akhelhna gawtna a ding a mi phun ahia?" chi

in (Kah. 3:39). Phunna ding asan om hetlou hinapi amah a kiphawk louh ziak a phun ahi, a dinmun leh a hihna ki theilou ahi, chi nuam dan ahi. A khelhna thupi dan a theih louh ziak in, gawt a om hun in phun zomah hi. A khelhna huaisiat dan thei hi maizen leh phun naksang a poisa leh kisik tuntun in Pathian kiang ah ngaihdam ngen pah ding hi. Mahni kitheihchet louh leh kitheihkhelh a poidan hiai ah muh theih hi.

Scientistte'n gamlapi a thil om etchetna ding in etlet (Durbin) a zang uh, a kichi hi. Doctor te'n ahiehleh mi etchetna ding in mi-etna (stethoscope) azang uhi. Tulai in damlou etchetna leh natna zonna ding in MRI (Magnetic Resonance Imaging) a zang uhi. Thil khatpeuh ahiehna diktak muhkhiak ahieh theihna ding in limtak a sui a, vanzat hoihtak toh, etchetna hoihtak a om poimoh hi. Gintak thu leh muanmoh thu a thil khatpeuh teh pahpah ding hilou hi. A chetna diktak a om theihna ding in sut detdet a, dapkual a, etchet a, kanchet masak zel ding ahi.

Jawlnei Jeremia in enchian ahiehchiang in a dinmun, hihna leh

omdan diktak theikhe ding a ettelna gen nuam ahi ding. Hiai mun a Jeremia in etchet ding a hon gen tuh "I lampite" chih ahi. Bang ziak a I lampite etchet kul hiam, i chihleh huai lampite theihlouhna leh theihkhelhna in phunna omsak hiven. Phunna kichi ahoihlou lam a lungkimlouhna genkhiakna ahi a, phunchiakna in kuamah bawlhohih ngeilou in kuamah lamtou ngeilou hi. Phunchiakna a om louhna ding in thilkhatpeuh a hihna diktak suikhiak a, muhkhiak teitei sawm ding ahi.

2. 'I lampite' kichi bang lampi genna ahia? Jawlnei Jeremia in, "I lampite zong in enchian ni" a chih bang lampite gen ahi peuhmah de aw chih thu poimoh khat ahi. Jerusalem lampite hiam, Damaska lampite hiam gen ahi kei a, Judah gam a lampi khatpeuh gen leng ahi kei. Pathian nam tel Israelte lampi, a hinkhua uh, a gamtat-khohei uh, a khosak dan uh, a ngaihtuahna uh, a nasepte uh, gen ahi zaw hi. Hoihtak a etchet ding tuh Pathian ta Israelte' lampi tot, ahinkhua uh leh a gamtat-khohei uh ahi.

Bangchi bang a huai lampite enchian thei ding uh hiam i

chihleh a tehma ding omsun leh a dikpen omsun tuh Pathian thupiakte a zuih uleh a zuih louh uh etchet ding ahi. Hoih hun kisa, hih dik leng kisa, ahunbi a kithoihna thillatte lan gige leng a hikha ding uhi. Sahkhua dan zuih ding omte zui vek sipsip leng ahi kha ding uh. Himahleh etchet ding khat omlai a om a, huai tuh a niteng gamtat-khohei uh leh a lungput uh ahi. Pathian thupiak sahhua dan teng kia zuih ding hilou in lungput leh niteng gamtat-khohei bangkim ah leng zuih vek ding ahi (Sam 1:1-2). Mi'n a hihna diktak theih a ut leh midangte hihdan leh midangte hindan apan a kiteh ding hilou in Pathian thupiakte a zuih leh zuihlouh ah a kiteh ding a hi zaw hi.

Hichi bang kietchetna in Pathian mai ah khial mah i hihdan leh chinglou i hihdan hon kimu chiansak ding a, huai in kisikna diktak toh Pathian hon naihsak ding hi. Huai ding in Jeremia in Judah mipite hanthawn hi.

Tuhun a Saptuamte'n leng Jawlnei Jeremia hunlai mah bang a Pathian neite kichi napi a amah gamlat lua i hikha ding. Biakna vai leh thumna kikhop khawng lel a Pathian lungkim ding a ngaihtuah i hikha mahmah ding uh. Eimah niteng hinkhua, gamtat-khohei leh lungput ah Pathian thupiakte zui mah i hi hiam chihte kivel phathak in, eimah lampite chiat enchian ni, Toupa lam a i kik theihna ding in. Huchi bang ding in Toupa'n Saptuamte hon ompih chiat hen. ■

SAPTUAM KEPNA: I LAMPITE ENCHIAN NI

Zekariah 4:6; Kahlate 3:40; Luke 1:38 – 45

- Pastor H Jamkhanpau, *EBCC Lungthul D*

“Thahatna in hilou, thilhihtheihna inle hisamlou, ka kha in ahi zaw, sepaihte Toupa'n achi” (Zek. 4:6)

THUMAPI: Saptuam kepna sem zoulou leh Covid veikhak apan deih bang a sem zoulou himahleng awlmohna leh puakgik dai theilou omman in kon gelkhia hi. Hun kikhek lamdang zel a mihingte kikhek a, khalam lunggulhna leh lohchinna kiam hi. Hon sukhate natnate, damsung khosak awlmohna liantate, gambuaina thute'n khalam leh hinkhuate sudai in, lum lah lumlou, vot lah votlou in ki-omta hi.

Hiai bang dinmun ah Pathian deihlam leh mihingte taksap (needs) diktak theichian a sem dia i lampite uh etchian poimohta hi. Jesu'n a gam, mite, amun leh hun dungzui in sem ua, zawlneite'n a mite dinmun dungzui a Pathian thupiak bang in sem thei zel uhi. Programme plan hoih, budget, zilna sang, phatuamngaihna, taimatna leh mite kipahna mai poimoh masa lou hi. Khasiangthou thilhihtheihna a Jesu Khrist itna luanglet hinkhua, mite hinna a Tanchinhoih kha thilhihtheihna toh tunkhawm poimoh pen ta hi.

I. SAPTUAM KEPNA I MAKAITE'N I LAMPITE ETCHIAN MASAK POIMOH (Nas. 20:23 – 31)

Makaite'n tu hun kikhek lamdang a koi a gahsuah zoulou leh tasam ihi ua chih i lampite uh etchet ngaipen hi. Nasep dingdan Pathian kha pina kichiantak i neih uh Makaite kisam i hi uh. A sisan a leite vak dia Pathian in khasiangthou a honseh ahih bang in kha pina leh thopna kichiantak i neih uh kisam lopetmahta hihang.

1. Makaite'n i lampi etchet ngaihna: Year Plan i bawl chiang a hoih i sakte thohkhawm thoh, khente

Pastor in guang pumset in, awlmohna leh veina nei a bawl omtalou hi. Huaiziak tak in i sepkhiat chiang ua routine bang a hihbuchinna mai a bawlkhiata. Plan sepkhiakna thumna a thei leh veipha ki-omlou ahihman in, a puangdi le omlou phial ahihziak in gahsuah zoulou hizaw hi.

2. Mipite khalam ngaihtuah, ki-awlmoh leh Pathian leh a Hotdamna lunggulh ding a thumna a kipumpiak a, kha vehna makaite a omna dia panlak masak ngai hi.

3. Year plan i bawl chiang in Pathian deih leh mite theichian a, i awlmoh taktakte kia bawl in, mipite theisiam sak in, kumbul apan saptuam thumna, bial thumna leh innkuan a panlak ding i gahsuhna dia poimoh masa ahi. Panlakna omlou a i sepkhiat gahsuh thupi lou hi. (Rom 8:14; Nas 20:23, 31; 16:6 – 10).

4. K h a s i a n g t h o u thilhihtheihna a Khrist itna a dimlet a nasepna lou a gahsuh theilou ihih dan kitheih gige poimoh hi. (Luk 24:49; Nas1:8; John 15:5; Kol. 1:19). Nang hotdam,

tunding ding hilou, Khrist in kha thilhihtheihna a a hotdam, tunding ding, a zattak dia kipiak ding.

5. Paula Thessalonika a a nasepna bang poimoh hi. (1Thes. 1). Paul tanchinhoih gen mite a khasiangthou thilhihtheihna toh nakpi a kitheihchetna toh tang in, khasiangthou a kipak in sang uhi. Kikhekna lamdang tak tung hi. Hiai bang bangzahta a poimoh leh lunggulhuai hi hiam!

II. SAPTUAM KEPNA AH MITE DINMUN ETCHIAN A THEIH POIMOH (Rom. 1:11 – 15; 9:1 – 5; 10:1 – 4; Mat. 9:35 – 38)

1. EBC in Nekzonna Dohkan Pulpit Nasepna (NDPN) ineih gingloute lak kia a hilou in eitualsungsaptuam ah leng a poimohta hi. Aziak Biakinn, Chialpina leh Camp, programme tuamtuam bawl a gahsuh zoulou hita. Programme Oriented ahilouh ding, programme kia a kipum dim lozenta, taksapte kia a programme neih le poimohta. I sepna chiat ua khalam a lungsim pia in, Gospel thu a houlim i tup uh a poimohta hi. (Nas. 8:4).

Saptuam masate lohchinna tuh “Tanchinhoih thu in a houlim uh” (They gossip the Gospel) chih ahi. I hinkhua ua Jesu neite lamdang leh kipak gige, chituam a i kimuh mateng uh tulai i mite mahmah leng kizoulou ding ahi.

2. Saptuam mipite'n khalam thu ah lungsim piakthak ngai hi. Lungsim piaklouh a kha in hongveh mawk di hilou hi. (Nas. 1:14; 4:31; 9:31).
3. A gam leh diktatna zong masa a, diktatna lunggulh a gilkialna, diktatna nei dia thumna toh kha pina ngen in, Laisiangthou ah i kiik uh ngai hi. (Mat. 6:33; 5:3 – 9; 1Pet. 2:1, 2)
4. Upa leh makaite a kipumngak lou a, niteng hinkhua a thumna leh Bible sim a kipumpiak a, niteng, hunteng a Pathian toh tonkhawm gige tup ding. Saptuam programme a i gahsuhna ding ua poimoh ahi. (Sam 27:4; Mika 6:8; Sam 84).
5. Tuchiang a i poimoh pen, Mari Elizabeth chibai buk in a sung a nau tang a, kha a dimsak in, a gingta nu a

hampaha (Luk. 1:39 – 46) a chih theih bang a, mite hinna a tuabang hon chih theih uh, lei chi bang a al poimohta hi. (Mat. 5:13 – 16)

THUKHITNA: Atung a i gen bang in Makaite halhna i tan masak a, ei hilou, Khrist itna luanglet mite hinna khek thei kha thopna i tan masak ngai hi. Huai kia hunlou, mipite'n khalam, Pathian lam a kisui a

niteng a Pathian thu a lungsim pia a, Bible sim leh thumna a kipumpiak tuh saptuam panlak leh programme gahsuahtua dia poimoh ahi. Hiai ding in, Mari bang a athu bang a, i tung a tung dia kipumpiak, kiphah leh thuman ngai, kha thilhihtheihna tua chiang in hongtung phet ding ahi. Ei kipiakna omlou in kha in semlou ding hi. Makai leh mipite' Pathian ah kipia in panlathak ni. ■

JABOK LUIGAL I KAIDING UH AW!

Rev T Thangzasiem, DS Thanlon

THUMAPI: “Huan, jan in a thoua, a zi nih leh, a sikhanu nihte leh a ta sawmlekhhatte a pi a, Jabbok lui ngahna ah a pita. Huchiin, a mau a pi a, lui a kan ua, a neih tengteng leng a kansak vek hi. (Gen 32;22-23)”

Amasa in simtu itte kumthak 2025 chibai konbuk masa hi. Singtanga piang leh khangkhia ka hih manin, vaigam khopli lian taktak sun leh zan a thawmging vengvung leh bengseng takmun toh a kibat louhna gending chileng tong leh lam bangmai ahi. Singtang a nuam leh tawldam huai ka sak mahmah tuh mual leh tang kimu zihziahte khawng, luiluang ging biahbiahte zak leh muh khawng mahmah nuam ka sak

lam ahia, lungsim hon tawldam sak mahmah hi. Tuabang a singtang dawn a lui luang ging sialsialte ka zak lain, ka lungsim ah “Jabok Lui” chih ka ngaihtuah khasek hi. Laisiangthou ka etchiangin hichiin a kigelh hi Jakob in. “Jabok lui ngahna ah a pita. Huchiin, a mau a pi a, lui a kan ua, a neih tengteng leng a kansak vek hi (Gen 32;22-23)” chiin kigelh hi. Hiai akipan i thupi lasawn in “Jabok Luigal i kaiding uh aw ” chih lungsim

bilkha a gingging mai tuh, ka deihdan tak leh lungsim a omdan takin gelhkhe zoukei mahleng sim theihdia hon gelhkhia tuh ka hita maive ! Kei kia a om a hiai “Jabok Luigal” chih ka ngaihtuah khak lel chiangin leng lunglen huai peuh bang ka sa a, khasiat huai leng sa in khitui luangthei khop in ngaihtuahna a saupai mahmah sek hi.

“Jabok” kichi tuh Heb’ thumal “Yabog” akipan lakkhiak sappau in “ “Flowing forth, to empty itself” chihna ahia. Paite pau in “luangkhia, hattak aluang, kiawngsak hiam, a hawm, a vuak” akichi theivek ding hi. Hiai Jabok lui tuh Israel simlam tanggam a om Gilead tang pang akipan hong luangsuk in, Jordan lui ah luanglut hi. Huan “Jabok lui” tuh lui setak ahihmanin thawm neitak a luang ahia, ging hunhun leh ging bolhbolh hiam, ging zuazua khop aluang hi dingdan ahi. Ka mit in mukei mahleng Jabok luidung siatdan tuh Arunachal Pradesh a lui minthang mahmah “Siang river” toh kibang sim dingin ngaihsutna ka nei hi. Hiai Siang lui leng China akipan Arunachal Pradesh State ahong luanglut luisetak leh suangphom lak ahia. A tui luangleng hattaka luang ahih manin, a kiang nai a omte

tui current in hiplut zoukhop a luang hat ahi kichi hi. Vangtahna ziak a tua Sianglui a kia te tuh zon ngaihna leng om theilou khop a luidung sia hiin kigen hi.

JABOK LUI LUNGNGAIHNA MUN AHI !. Hiai Jabok lui leh Jordan lui kisuk tuahna muntak ah, Jakob in lungsim giktak leh puakgik liantak pua in hun zang hi. Jakob lungngaihna tuh bangdang ziak hilou in, kum 20 paisa peka a u-Esau in “ka pa sunni ding a nai ta a, huai hun chiangin ka nau Jakob ka that mai ding (Gen 27;41)” achih ziaka lau leh lunggim ahi. Esau kampau leh thiltup ziak in apu Labante kholam ah galtai hi. Tua a galtaina mun ah zi leh tate nei in, huangvulh ganta ah vualjawlna tamtak adon banah sikha tampi leng nei hi. Himahleh Paddan-aram gam akipan a pianna gam a kiknawn dingin Pathian sapna sangtak tang hi. Jordan lui hon naih deuhdeuh a alung gim deuhdeuh hi. Gamchiam hon neh deuhdeuh hinapi’n a puak gik deuhdeuh mai hi. A nungram a kiknawn dingin lah a puzonpa Laban in a loh 10vei mawngmawng ahei lamdang saksa ahia, malam apaizom zel ding lah a mah thahsawm

a u-Esau maituah ding hizel.
Koilam a manohtha dia le ?

Pathian sapna lah nial theih vual hilou ahihman in apaizom zel hi. A pa Isak lah tek mahmahta, khua muthei nawnlou ahih manin sawtpi adam nawnkei ding chih theihsa ahi. Tuabang puakgik lianpi toh lui kan ding tuh Jakob adingin thil lauhuai tak ahia, sih leh hin kal thu a hihman in chiimulsi thou sungsung theikhop a lauhhuai ahi. Hiai bang dinmun haksatak toh Jabok luipang ah lungngaihna leh mangbatna hun azang hi. Tuni'n khovel i khualzinna ah haksatna leh lungngaihna tuaklou i omkei ding uh. Pathian vualzawl na tampi i don laiin vantage kisakna in i hinkhua abukzou zawkha dekdek hi. Taksa damtheihna toh kisai ah complaint ding bei kuamah a omkei ding hi. A thaudeuhte gawn ki ut in, a gawngdeuhte thaudeuh ki utzel hi. Genkhiak theihlauh inkuan haksatnate, nupa kal haksatnate, tate ziak a lungngaih mangbatna ichihte a tuaklou omlou ding hi. Tuabang haksat hun in Jabok luipang ah i ki sungbaw ding uh aw. Jakob banga Jordan lui luang diahdiah leh Jabok lui luang bolhbolh kal a lungngai taka hunzang i om

zenzen leh hiai thugelth simzom
zel dingin i ki ngen uhi.

JABOK LUIGAL I KAIDING UH AW! Unaute, hiai Jabok luipang a lungngai leh mangbang taka om Jakob in ngaihdan nih anei hi: Khatna ah- Mihing kam khumtak leh kam siamtak, huai tuh khalam suak hilou naknuai kamsiamna toh a haksatnate sukfel asawm hi. A u-Esau kiangah“Ka toupa, Na sikha Jakob a hongkik nawnta e” (Gen 32;4-5) chiin va gen un chiin palai sawl hi. Jakob in a lungngaihna zouzaite khalam subject banga sim ding ahihlaiin, salam subject banga sim in, khalam thil himhim a muban kei hi. A salam lungsim toh maituah a sukveng hiau sawm khasek hi. Huchiin a palai sawlte hong kikhawn ua lah, a upa Esau kipahna kamkhum zakding bangmah a om theikei a “ Na u- Esau kiang kava tung ua, a sepaih 400 toh nang maituah dingin a hong pai ahi (Gen 32;6)” chih thu toh hong tungkik daih uhi. A u kia leng lauhuai lua ahihlai a sepaih hon 400 toh hongkuan uh chih thu a zak tuh Jakob adi'n thil lauhuai tak ahi. Taksa dana kalsuan na leh khalam ki ngaihnamna muhdang omlou

zaw bangmah hilou ahi chih hon muchian sak mahmah hi.

Nihna ah- Jakob in salam formula nihna honzang nawn in, a belum honte, a bawng honte, a sabengtung leh sabiltungte pawlnih a khen in, a u-Esau maituah dingin pawlkhat pai masa sak in, pawldang khat pen paina nung sak hi. Esau in amasate ana thah zenzen leh a nanungte a taimang theihna dingun chih ahi (Gen 32;7) Gentaksa bangun Jakob in a buaina tuh salam dan ngen a en

in, salam pilna mai toh sukfel sawm zel mahleh bangmah apha tuam kei hi. Huchiin a u-Esau suk lungkimna dinga thilpiak ding agan neih tengteng pawlnih suah nawnin “Kipahman ka maah pai leh a lung ka damsak ding a, huai nungin a mel ka mungam ding; huchiin, a honna kipahpih kha ding, a chi ahi (Gen 32;20)” chih policy toh hong kisa nawn hi. Hichibang a present apiak nung inleng Jakob a kikhek tuankei ahi.

Sutzop ding... ■

BIBLE STUDY



Pastor Khamkhanchin Ngaihte, Local Pastor, EBCC Zion

Text : EPHESATE 5:21-6:9

Thupi : INKUAN A VAK TATE HINKHUA

THUMASA: Khovel tuipi kihawt lak a a itna khut muanhuai a hon len a, kumthak 2025 honpi kai I Pathian min phat in, simtu deihtakte I Toupa Jesu Khrist min in Kumthak Chibai ka hon buk hi. Kha masa in vak tate khosak dingdan i na sinta ua, tu in, i kumthak thupi “I Lampite Enchian ni” chih tawh kituak mahmah in, inkuan sung a vak tate khosak dingdan, vak tate i hihna in i inkuan sung kikepna leh kisaina a hetkhak ding a hihdan i sin ding uh.

5:21. “Khrist laudan siam in kiniamkhiak chiat un.” Bung 5:21 in bung 5:1-20 leh 5:22-6:9 a khaikhawm hi. Khat leh khat tung a kiniamkhiaktuah

chiat hinkhua tuh kha a dim hinkhua kilatna khat ahi gige. Kiniamkhiakna in gingtu khat leh khat kizopna a khoihkha lou theikei a, gingtute

kipawlkhawmna (community) sung ah khat le khat kizahtak tuah, kiniamkhiak tuah chiat a, ei kia kingaihtuah lou a, ei iki it bang a midangte it ding chih Laisiangthou hon sinsakna mah ahi. Bung 5:22-6:9 sung ah tua thu mah hon zom a, ahihhang in amun (a context) inkuan sung ah hon zang hi. Gingtute inkuan sung a kizop dingdan Pathian geldan 5:22-6:9 ah kimu hi.

5:22-24: Pasalte tawh kal a Khristian Zite om dingdan Paul in “Zite aw” chiin hon pan a, a genchetna a om tuanlouh man in Khristian Zi tengteng (pasal nei) uap a a gen ahi ding. Kiniamkhiakna ding mite tuh “noumau pasalte” chih ahi. Hiai ah leng “pasal” (husband) chihban a genchetna a om louh man in, Khristian pasal tengteng genna bang alak ding ahi. Pasalte kiang a kiniamkhiakna ding ziak siamna, pilna, neih leh lam leh taksa felna bangmah gen beh a om kei a, pasal (husband) ahihna ziak ban uah “zi lutang” ahihziak uh ahi. Hiaimah tuh Kolosate kiang ah leng gen in ana om (Kol 3:18).

Tang22na a “Kiniamkhiak” chih English ah “submit,” (NIV, ESV),

“be subject to” (NASB), chihte akizang. Greek ah hupotasso ahi a, “mahni deihtelna a midang khat thunuai a ki tahlut” chihna ahi. Sepaihte lak a kizang thumal ahi. “Toupa kiang a na kiniamkhiak bang un” zite amau pasalte chiat kiang a kiniamkhiak ding chih thupiak ahi. Toupa kiang a kiniamkhiakna tuh mahni pasalte kiang a kiniamkhiakna ding siksian/kibulphuhna ahi. Hiai tegel a tonkhawm ding ahi. I khamitna, Pathian I itna tuh I nupa kal a akilat masak ngeingei ding ahi (cf. 1 John 4:20).

Tang 23 ah kiniamkhiakna ding ziak/san hon gen nawn hi. “Zi lutang pasal ahi” achi. Hiai a theihding a poimawh ahihleh, Khrist amah ngei pumpi (saptuam) hondampa hi a, saptuamte lutang ahimah bang in chih ahi. Khrist saptuam lutang ahihdan ngaihtuah vengveng tuak ahi. Paul hun lai a Rome mite tawndan ah, numei in pasal a neih nung in leng a pasal hilou in a pianna pa’n a tung ah thuneihna neilai hi. Huaiziak in, zi in a pasal sang in a pianna pa mit mei veng zaw a, tuaziak mah in kikhenna baihlam diak

hi. Paul in, kiten nung a zi leh pasal “sakhat” ahihna uh (Genesis 2:24) zang in, zi tung a thunei tuh apa hinawnlou in a pasal ahi chiin sinsak hi. Hiai a “lutang” (head) chih in dinmun ziak a thuneihna, makaihna kaw k hi. Pasalte zite lutang ahihna utuh servant leadership ahi a, a thuneihna pen zi leh tate humbitna, hoihna, leh khantouhna dia zat ding ahi. Makaih a omte hoihna leh hamphatpih ding tup a nei makaihna ahi.

Tang 24 ah, saptuam (gingtute) a lutang Khrist kiang a akiniamkhiak etton a nei a, zite amau pasalte kiang chiat ua akiniamkhiak ding uh ahi chiin hilhchet beh hi. Kiniamkhiakna in a uap “bangkim ah” ahi a, za mahmah hi. “Bangkim ah” (in everything) chih in Laisiangthou sinsakna tawh kikalhte tanpha uap a ki niamkhiak ding gen hi din a ginhuai kei. A ziak, mihing thu man sang a Pathian thu man zawk ding chih ahihman in (Acts 5:29). Ahi a, “bangkim a pasalte kiang a kiniamkhiak ding” chih in pasalte makaihna nuai a siit neilou a kitahlut a, pasalte thuneihna zahtak a, gup a, hanthawn ding genna ahi

zaw. Bangkim a pasalte thu man ding chih hi lou in, kiniamkhiak ding a sinsak ahi chih leng theih ding ahi. Thumanna i chih leh kiniamkhiakna i chih kibang khin lou ahi.

5:25-32: Zite tawh kal a Khristian Pasalte om dingdan Pasalte tung a Zite mawhpuak a sinsak zawh in tu in Zite tung a pasalte mawhpuak hon sinsak leuleu hi. Pasalte tung a Zite mawhpuakna sang in Zite tung a pasalte mawhpuakna tawh kisai sinsakna sau zaw tham hi. A ziak hithei khat ahihle, huai hunlai a Rome mite chindan tawh kilehbulh sinsakna ahih ziak ahi.

“Na Zite uh it un” chih niteng hinkhua a thil tung ding genna (present imperative) ahi. Lawhkhiak (earned) itna hilou in piakthawh itna ahi. Pasalte itna tanna dia Zite lam a chitna bangmah gen a om kei. Itna ziak in saptuamte ading in Khrist akipumpiak hi (v25). Khrist’ itna in saptuamte (object of love) hoihna leh pichinna ding a tup pipen ahi. Tuabang itna tuh pasal in zite a itna ding ahi. Kolosate ah Paul in, “pasalte aw, na zite uh it unla, a lak uah hanhat kei un” ana chi hi.

Khrist in saptuamte it a, a sik ua ding a akiapiakna in a tup nih gen lat in om hi: saptuamte siangthou sakna ding, leh genbangloulou a Khrist adia mou ahihtheihna ding ahi. Khrist itna in saptuam khelhna apan hum in siangthou sak a, ama adinga mou (bride), genbangloulou leh siangthou hiding in bawli hi. Tuamah bang in, pasal in a zi a itna tungtawn a a zi a hum a, khelhna thununna apan Khrist bangsem a khang ding a a hanthawn a, a thop ding ahi (v27). Itna dik in thilhoihlou apan it a om pen hum a, thilhoih in lamtou (edify) hi. Zite ziaak hilou a Toupa ziaak a zite it ding ahi zaw hi. Tang 28 ah, Paul in zi leh pasal sakhat/pumkhat hihna (cf. 2:23) gen lang nuam in “amah a zi itpa tuh amah leh amah ki it ahi” chi hi. Nupa kizopna sang a kizopna kip zaw leh bul zaw kizopna dang mihingte lak ah a om kei a, huaiziaak in hiai sakhat hihna tuh suksiat theihloulou, palzut theihloulou ahi (t 31). Hiai nupa sakhat suahna Paul in “thuguk thupi/thusim kiseel” achi. Thusim kisel nupa sakhat suahna tungtawn a taklat a om tuh tunung a Khrist leh saptuamte kipumkhatna/kitenna ding ahi.

6:1-4: Nulehpa tawh kisai a Tate hihna Zi leh Pasal kal kizopna a gen zawh in tu in nulehpa tung a naupangte' mawhpuaakna hon gen zom hi. Nulehpa tung a naupangte mawhpuaakna (duty) nih Paul in a gen: 1). Nulehpa' thu man ding, 2). Nulehpa zahtak ding ahi. Hiai a poimawhna tuh – thildik ahihban ah thupiak chiam nei (command with a promise) masa pen ahi. A gah ding tuh “nang ading in a hoih dia, lei ah leng na damsawt ding hi” chih ahi. Nulehpa zahtak ding athupiak thupiak 10te lak a a ngana ahi (Eksodas 20:12; Deut. 5:16). Nu leh pa thuman Pathian in ngai poimawh mahmah a, a nu leh pa simmawh zaw si mahmah hen ana chi (Eks21:15; Lev. 20:9; Deut. 21:18-21; Marka 7:9-13).

Thumanna i chih nasep ah kilang a, zahtakna i chih lungput tawh kisai ahi. “Toupa ah” (in the Lord) chih thumal poimawh ahi. Version khenkhat ah “Toupa aa hita na hihman un nulehpa thu mang un” chiin a let hi (NLT). Khristian hihna ziaak a thumanna ahi a gen nop. Nu leh pa thumanna in hiai leitung

mahmah a leng vualzawlna (lei a leng damsawt ding) ahihman in hamphat huai sawnsawn hi.

Tang 4na ah, tate lam a pate nasep ding hon gen kiik hi. Hihlough ding khat leh hihding khat gen in om hi. Huai tuh- tate “hihthangpaih lough ding” (negative) leh, “Toupa thuzawhna leh hihhna a kep ding,” (positive) chih ahi. Hiai a “hihthangpai” hiam “thangpaisak” kichi in tate lungkesak ding hiam kingaisesak thei ding zawng a kepna leh etkolna lam gen ahi. Tate kepna a pilvan mahmah ding, Toupa deihdan zon a, huai bang a pi a kep ding ahi. Theihding a poimawh khat, naupangte’n “nulehpa” zahtak a thuman ding a thupiak tawh kiton in “pate” (fathers) min lawh in insung leh tate kepna a pate poimawhna, makaitu ahihna uh gen uang nuam ahi chih theih ding ahi.

6:5-9: Khristian Sikhate leh Pute thuhilhna Bung 6:5-9 sung ah Paul in Khristian inkuan sung a gingu suak leh sal a omte leh a pute uh kizopna ding dan hon gen hi. Paul in sikha (slaves) te leng gingtute kipawlkhawmna a kahiing poimawh ahi uh chih taklang nuam ahi. Huai lai in

(Roman leh Greekte tawndan ah) sikha (slaves) ten khotang kipawlkhawmna (society) ah mun nei lou uhi. Himahleh, gingtute lak ah bel tuabang ahilhough ding ahi.

A pute uh lam a sikha te lungput ding dan tawh kisai gendan nih (positive leh negative) in hon gen hi. Khrist thumang bang a pute thu man ding (v5), Khrist sikha bang a lungtang a Pathian deiham hihzaw ding (v 6), Toupa nasem bang ding (v7). A lungput lough dingdan uh a gente: mihing kipaksakte lel batlough ding (v6), mihing nasem bang phet hihlough ding (v7) chihte ahi. Ginglou mite kiang hilou a gingu sikha (slave) te kiang a gen ahihman in mihing nasem bang phet hilou a, Pathian nasem bang a sem ding a hasuan ahi. Michih (sikha hiin zalen hitaleh) in a sep bangbang utawh kituak a Pathian kiang apan munawn ding uh ahihman in, Pathian lungkimna dia sepding ahi chiin hasuan hi. Theihding a poimawh bel Paul in sikha hihna (slavery) siamtan hiam hoihsa chih lam hilou in, ana zatsa uh tua pen Khristian huaitak a zang ding a hasuan ahi zaw. Sikha neitu (slave masters) te’n leng van a heutu (Pathian) nei uh ahi

chih phawk a, tua Pathian tuh amau tung leh a sikhate uh tung a Pathian ahihman a itna tawh a sikhate uh enkol ding in hasuan hi. Sikhate leh a pute uh tung ah Jesu Khrist TOUPA ahi tuaktuak hi.

TAWPNA: Mihing leh mihing kizopna chidam omsaktu tuh kingaihniamna ahi. Tua kingaihniamna tuh Pathian tawh kizopna gah khat ahi. Hiai mah Khristiante niteng hinkhua chiamtehna thupi

pen khat ahi. Jesu Khrist ziak a kingaihniamna in midangte tawh kal, nupa kal leh insung khaikhawm in kichimat sak hi. Gary Thomas in, sikha hinkhua kisinna ding a mun (context) hoih pen tuh nupa hinkhua ahi achi. Pathian' thu sinsak bang a kikepna leh kimakaihna insung a bit a, a detdou a, a khangtou in vualzawlina ahi. Simtute, tu kumthak ah kingaihniamna tungtawn a inkuan kizopna lamthak chiat ding in Toupa'n hon vualzawl chiat hen. ■



Gammial Aw

Amasa in Gammial Aw simtute tengteng i Toupa leh Hondampa Jesu Khrist min in kumthak chibai aw ! Pathian hoihna leh chitna ziak in kumkhat vingveng field tungtawn a Agamna i sepzoh nung in mathak la a field tungtawn a i loumate sunzom nawn thei ding a kumthak a hon pikai i biak Pathian thupina i pia hi. Kumbul a i dinlai in, Pathian in a hoihna leh vualzawlina tamtak hon piaksate phawkkawm a thathak la nawn a, field a ding a i hih theihna zahzah suah a thilpiak leh thumna a naksem a pang nawn ding in saptuamte i kichial hi. Field tungtawn a i kalsuannate apan gah muh theih ding Toupa'n hon piaknawn anuai ate ziak a kipahtu i gen kawm in, enkhawm nawn ni.

A. HIMALAYAN MISSIONS FIELD

KIPAHTHU GENNA LEH THUMNA DINGTE:

1. Toupa'n kumkhat sung vingveng i thumnate leh sepnate hon thawnsak lou a, khalam leh salam a vualzawlina tampi field tungtawn a muhtheih ding hon piakte ziak a, kipahtu gen in,

- tu kumthak 2025 a khamangtang tamsem Toupa'n hon piak nawna ding in thum ni.
2. Toupa'n field a semtute kalsuanna tungtawn a gah muh ding gingthak mi 10 leh baptisna tangthak 12 hon piaknawnte ziak in kipahtu gen ni. Amaute ginna a naupang chik hilai ahihman un, thumna tampi toh amaute delhzui ni.
 3. Khristmas hun pen semtute leh saptuamte a ding a tangthupha puanzakna hun manphatak ahih toh kiton in amaute'n bangmah buaina omlou in field ah lamzangtak in kalsuan thei uhi. Kipahhuai i sa a, Khristiante a ding a hunbi poimohtak a semtute kalsuanna tungtawn a gah i muh ngei lametna lianpi i nei a, tua bang i muhna ding in thum ni.
 4. NEBC sung a Leadership seminar singtang leh phaizang a neih a omte manpha leh lohchingtak a neihzoh in omta, kipahtu gen ni. Seminar neih hun a sinsak a om saptuam heutu makaite'n amau omna local chih ah Pathian belamte kepna kuhkal leh chitaktak a a hon sutzop theihna ding un thumpih ni.
 5. Sikkim Missions Field, Gangtok station a semtu Evan H Thangkhansiam in music sinsakna pan theita, kipahtu gen ni. Music sinsakna piak a om in mi tampi hon sukkhak a, Ministry manphatak leh khamangthang matna vanzat manpha ahih theihna ding in thum ni.
 6. Field a gingtu khenkhat a omdan luite uh tawpsan theilou a om ban uah khenkhat biakna kikhop tawpsan ding bang a thuzoh theih om lai uhi. Tua ahihman in, amaute khalam pichinna ding leh nungzuihna ah chihtaktak a kal hon suan theihna ding un thumpih ni.
 7. Field tungtawn a saptuamte'n Toupa gamna sem a i kalsuanna lamzang leh lohchingtak a kalsuan ahih theihna ding leh salam leh khalam a vualzawlina tamsem i tankum hong hihna ding in thum ni.

B. DHEMAJI MISSIONS FIELD

KIPAHTU GENNA LEH THUMNA DINGTE:

1. Toupa'n EBCC Lachan ah baptisna tangthak leh dansiangthou a kiteng thak nupa kopkhat hon piaknawnte ziak in kipahtu

gen ni. Amaute Khrist a ding a theihpihtu muanhuai leh saptuam a ding a khuam muanhuai hong hih theihna ding un thumna in delhzui ni.

2. Field Ministry subuai ding leh nawngkaisak ding zen a bangmah buaina omlou a Pathian ompihna toh tuni Chiang Semtute'n chidam a kumthak melmu a semthei nawnta ahihman un kipahtu gen ni. Pathian khasiangthou ompihna toh kumkhat sung gahsuh leh lohchingtak a semtute'n hon sepzom nawn theihna ding un thumpih ni.
3. Namgharia a om Mr Dhiraj Doley leh inkuante semtute'n tanchinhoih thu a houlimpihna tungtawn ua amaute'n Jesu Khrist a Lal leh Hondampa ding ua hon saan theihna ding un thumpih ni.
4. Mrs Sumika Doley i na thumpih zel ahi a, daltu omlou a baptisna hon tan theihna ding in thumpih lai ni. Baptisna tang ding a kiman himahleh a sungkuante lam apan dalna om ziak a tangthei nailou ahihman in a sungkuante a ding in leng thumpih ni.
5. Khristmas hun a semtute'n station chih ah Khristmas Project tungtawn a gingloute lak a tangthupha puanzakna nnasep bangmah buaina omlou in lamzangtak in neitheh uhi. Hiai hun a thu leh la kigenkhiate Toupa'n hon zatsak a, tunung a gingloute lak a gah kipahtuaitak muh ahih theihna ding in thumna toh delhzui ni.

C. HOJAI MISSIONS FIELD

KIPATHU GENNA LEH THUMNA DINGTE:

1. Hojai leh Lanka Station pansan a tuition tungtawn a semtute'n a kalsuanna uh lamzangtak in paizom theizel, kipahtu gen ni. Tu kumthak a Pathian kha ompihna toh tuition tungtawn a semtute kalsuanna a gah kipahtuaitak muh a hihna ding in thum ni.
2. Hojai ah semtute'n gingu tamlou omte toh biakkhawmna a neihzel uh dalna omlou in lamzangtak in neizom theizel uh, Pathian kha ompihna toh lamzang a biakkhawmna tu kumthak sung a leng sutzop ahih theihna ding in thumpih ni.

3. Khristmas hunbite ah ginglounge lak ah semtute'n tanchinhoih puanzakna nna sem a kalsuanna a neihte uh thawnlou a, Pathian apan vualzawlna gah kipahhuaitak muh ahieh theihna ding in thumna toh delhzui lai ni.

D. GOALPARA MISSIONS FIELD

KIPAHTHU GENNA leh THUMNA DINGTE

1. Field a Ministry pimohtak ahieh ngei lametna toh Dhupdhara Station pansan in Grassroot Football Coaching pattheih in omta, kipahthu gen ni. Maban ah lamzangtak a sutzop hong hih a, football coaching tungtawn a naupangte leh a nu-le-pate uh kal a kizopna hoihtak hong om a tanchinhoih tangkoupah ahieh theihna ding in thum ni.
2. First Aid Project tungtawn a semtute kalsuanna lamzang zel, kipahthu gen ni. Maban a Project toh kisai a medical camp manpha leh gahsuahtak a hon neih theihna ding un thumpih ni.
3. Field a ginglounge kiang a semtute'n Jesu Khrist thu a genpihsate uh lungtang ah Toupa kha in nna a sep a, Jesu Khrist a hondampa ding ua hon saan theihna ding un thum ni.

E. KAMRUP DISTRICT

KIPAHTHU GENNA leh THUMNA DINGTE

1. Kamrup District sung a semtu innkuan thum omte'n Pathian ompihna toh lamzangtak a kumkhat sung vingveng chidamtak a semzou thei ahiehman un kipahthu gen ni. Pathian khasiangthou ompihna toh semtute'n kuhkal leh chihtak suah a naaksem a hon sepzom zel theihna ding un thumpih ni.
2. Semtute tungtawn a Pathian thu genpih khak a om mite lungtang a a thuzakte uh a thaam a, Pathian lam a hon zot theihna ding un thum ni.
3. Station thak Bamunigaon ah Mrs. Deepali Rabha leh a sungkuante semtute'n Pathian thu a houlimpihna nei thei zel uhi. Semtute kalsuanna Pathian in hon vualzawlsak a, gah kipahhuaitak muh ahieh theihna ding in thumna in delhzui ni.

F. PAWL DANG TOH SEPKHAWMNA

Pawldang toh sepkhawmna a gamkuan Missionaryte'n Pathian ompihna toh amau louma chiat sem in kalsuan sunzom thei uhi. Theihngeilouh gam a gamkuan khia himahle uh tuni Chiangchiang in haksatna leh dalna bangmah omlou a maban sawn thei ahihman un kipahhuai i sa hi. Pathian vualzawlina toh Ministry manpha leh gahsuahtak a tu kumkhat sung hong kalsuan nawn theihna ding un thumna tampi toh saptuamte'n delhzui ding in i kingen hi. ■



DORCAS *Corner*

Kumthak 2025 January hon musak Toupa min phat in thupina ka pia hi. Simtute Hondampa Jesu Khrist min in kumthak chibai. Hun nuam leh haksa kikalhelh in kum 2024 Pathian ompihna toh pal galkai thei in i om a kipahhuai i sa hi. I hun paisate enkik lehang nuam leh kipak a hun i zatte bang ngaih vungvung hun a om hi. Huchibang kal ah i hun tuahkhak haksa mahmah i damsung a hichibang hun nuamlou leh haksa tuahkhak nawn ding uthuai lou om ding hi. A hi a, i tung a thil hong tung leh i lampi totkhakte Pathian hon theihpih louh omlou hi. Pathian mitmuh ah vangsia a om ngeikei, bangteng i tuahte i hoihna ding a hon sehsak hizel ahi chih phawk ni. Pathian itte, ama'n a seh bang a a sapte a di'n, a hoihna ding un bangkim in a sepsak chiat chih i thei hi (Rom 8:28). I hun paisa a sepkhelh leh lampialna i neihkhak leh omdan hoihloute bawlhak thei ding a hun hoih piak a omlai i hi a, hamphatna a la in Toupa thu tungtawn a kibawlpha ding in kisa ni. I Lampi zuih lel koi lampi a hia chih kivel ni. Sam gelhtu in:

- 1) Na thu tuh ka khe a ding in khawnvak a hi a, ka lampi a ding in vak ahi (Sam 119:105).
 - Na thu (Pathian thu): Pathian thu in a thuhilhite, a dante leh a thuchiam.

- ‘Ka khe a ding in khawnvak’: I paina lampi chiantak a muhtheihna dia Pathian thu in hon makaih, hon lamhilhtu ahi. Khawnvak in mialna a salhvak bang in, Pathian thu in hinna lampi zotna ding lam hoihtak in honpi hi.
 - ‘Lampia a ding in vakna’: Hiai thu in Pathian thu in thil tengteng a hon makaih aihna gen hi. Mimal khat in a lampi zuih a muhchet theihna ding a vakna lel hilou in, thutak in i hinkhua a nuam leh haksa mun a leng hon makaih in navakna hon pia a, i damsungteng honpi tawntung ding a hihna gen hi.
- 2) Ka omdante ka ngaihtuah a, na thu theihsak lam ah ka kalsuan hi (Sam 119:59).
- ‘Ka omdante ka ngaihtuah a’: Hiai ah Sam gelhtu in amah hinkhua, a nasepte leh deihtelna a bawlte ngaihtuahna hun pia hi. Amah leh amah kivel in Pathian deihdan lampi a kipan in a lampial kha hiam chih kitheichian hi.
 - ‘Na thu theihsak lam ah ka kalsuan hi’: Hoihtak a kivel a a kitheihchet Chiang in a lampialna a kipan in thupukna la in lampi dik lam zuiding in a lunghei hi. Pathian deihdan lampi zui in kalsuanta hi. Pathian deihdan lampi bel a dante diktak a zui, a thupiakte mang a a thuchiam ah kinga hi.

Jesu’n a nungzuite kiang ah, ‘Nou a dia mun bawl ding a ka kuan leh ka hong kknawn ding a, ka kiang ah nou ka hon la ding, ka omna a nou leng na omsam theihna ding un. Ka hohna ding a lampi na thei uh’ a chihlai in Thomas in a kiang ah, “Toupa, koi a hoh ding na hia ka theikei uh, a lampi bangchi’n ka thei ding ua?” a chi hi. Jesu’n a kiang ah, “Keimah lampi leh thutak leh hinna ka hi; keimah a pailou kuamah Pa kiang a tung kei” chi’n a dawng hi (Jn.14:3-6). Khristian gingtute lamentak a Pa kiang tungding a kisa, huai lampi zuizui a i kitheih lai in Thomas bang a lampi ka theikei uh chih maimah khak ding lauhuai ahi. Hun nanung hita, Jesu hongpaina ding niteng a hongnai hulhul lai in Jesu Khrist lampi, thutak leh hinna tawn a pai teitei ding in kipanthalak ni. Huai ding in Pathian thu mah pansan in i hinkhua kivelthak ding a

hon theisak ding in sim in, a hoihloute bawlhak ding, hihkhelhte kisik a lam dik zui ding in deihtelna bawl ni. Pathian thu ei hon makaihtu a zang in hinkhua kikheng lamdang sak ni. Khatveivei thupukna haksa lak ding omhun i tuakkha thei, huchih hun a leng Pathian mah in i lampite vaksak ding a haksatna mun a leng hon mualsuahpih zel ding hi. Pathian thu hing gige kimakaih sak in David in, Ka kalsuante'n na lampi a tawn ziahziah a, ka khete a tal ngeikei hi' a chih bang in Toupa lampi zuichiat ding in kisa thak ni. Toupa'n hon vualzawl hen. ■



YOUTH *Corner*

BANG LAMPI ZUI NA HIA?

I lampite zong in enchian ni, Toupa lam ah kiknawn ni, Kahlate 3:40.

A zahngaihna leh hehpihna ziak a Kumthak 2025 honpi galkai i biak Pathian leh i Hondampa Jesu Khrist min koimun peuh a om leh KTZ simtute tengteng Kumthak 2025 Chibai ka hon buk masa hi.

Kumbul ah i ding ua, Bangchi'n i zangtou ding ua? Bangteng tuak ding i hia? Tukum in bang honpuak dia? Chih kuamah in i mailam ding bangmah i theikei uhi. Michih in tup-le-ngim banghiam neichiat ding in i kilam-en hi. Bangteng hileh damsung kumte simdan siam a pilvangtak a hinkhua i zat ua kalsuan poimoh mahmah hi. Tukum zangtou dia i kisa lailai in hiai a nuai a i zuih ding lampi thum om hi. chih phawk a mahni utdan leh nopsak dan ah hizaw lou in Toupa deihdan leh lam-et dan a kalsuan ding in i kichial hi.

1. Kalvary Lampi (John 19:17-22): Kalvary Lampi i chih chiang in sisan luanna, gim thuakna, singlamteh puakna lampi ahi. Na leitung khualzinna ah buaina leh haksatna, lungkham mangbatna, lungkia leh beidong kisa a panpihtu ding neilou a na kingaihsiat hun chiang in Jesu'n nang ding a atot Kalvary lampi phawk thak ding in i kingen hi. Khrist in leng nou a hon thuaksak ziak in,

huaibang hihding a sap na hi uhi; a khap a na zuihna ding un zuih ding a hon nutsiat ahi. (1Peter 2:21) “Nou semgim leh puakgik paw tengteng aw, ka kiang ah hongpai un, keiman khawlina k'on pe ding hi. Ka hakkol pua unla, kei a kipan zil un; thunuilut leh lungtang kingainiamtak ka hi; huchi in, na kha ua ding in khawlina na mu ding uhi. Ka hakkol a nuam a, ka puak leng a zang hi” a chi hi (Matthai 11:28-30) Hiai Kalvary lampi lungsim a ngaihtuahna toh kalsuan peuhmah le hang i tuah khempeuh “a hoihi hi ka kha di'n” chi thei a hinkhua nuam leh zangkhai zang a kalsuan thei ding ihi.

2. Emmau Lampi (Luke 24:13-35): Emmau Lampi i chih Chiang in Toupa toh tonkhawmna, Jesu toh kikholhna lampi chihna ahi. Hebrew pau in 'hammat", tua pen "tuisanaak (hot spring)" chihna ahi. Toupa Jesu sihna apan a thohnawn khith nih vei a kilakna pen Emmau Lampi a khualzin nihte tung ah ahi. Jerusalem apan mel 7 in Emmau gamla hi. Amaute Jesu toh tonkhawm ua, Jesu toh nitak ann a nekhawm uhi.

Ka tuailaipte aw, i kalsuanna ah leh i zuih lampi a Jesu toh tonkhawm in, houlimkhawm in, nekhawm le naknop na maizen inchia. Thawmhauna, lauthawngna, khattang kisakna leh lungngaihate i hinkhua a vang mahmah ding hi. En bel khatvei vei Jesu bang dongkholh i sa ua, nusia, ngailou leh deihlouw in i koih sek uhi. Emmau lampi a ten zaw khou uh ahi. Jesu toh ton ding in amah khou inla, houlim in nekhawm in, i lampi zuih ah kalsuan khawm ni.

3. Damascus Lampi (Nasepte 9:1-19): Damascus Lampi kichi Bible in "sisan a dim sai-ip (sack) meikaang san" bang chihna ahi. Damascus pen Syria khopi (capital) ahi. Khalam ah kikhekna chiamtehna (symbol of transformation) in kizang hi. Laisiangthou pumpi ah 55 vei kimu hi. Khristiante bawlsia Paul kikhekna Damascus Lampi ahi. Kikhekna lou in Khristian kisuak theilou a, vangam kitung theilou hi. Tua kikhekna ding in Damascus Lampi zui a kalsuan ngai ahi.

Tu kumthak ah na hinkhua pen Belamching Jesu Khrist pian a mit mahmah ua va mu a lungkim leh kipak a Toupa Phat a a kinkawn leh Mipil te bang a lamlui hilou a lamthak a paite bang in na hinkhua a kikhekna toh Damascus lampi hon tawn a kalsuan ding in i kichial hi.

Paul in "eite gim tampi thvak in vangam i lut ding" a chih bang in, Kross lampi pen a nuam hilou in gimna, kho-ul kaina, khitui naptui luanna, haksatna toh kidim lampi ahi. Himahleh Emmau lampi a minih khualzin leh Damascus lampi a Paul bang in na hinkhua ah kikhkna leh lungkimna na neih theihna ding in "Na lampi zuih hon enchian thak in" chih i kichialna ahi. Toupa'n simtute hon vualzawl chiat hen. ■



CHILDREN'S *Corner*

CONTEMPORARY CHRISTIAN ISSUES (CCI) SEMINAR 2024

Baptist Children Department, EBC-Headquarters saina in November 24, 2024 (Sunday) zinglam 10:30 akipan Gospel Centenary Hall, New Lamka ah Lamka North leh South Division sunga BCD Senior pawl leh sinsaktute a dingin CCI seminar neih in om hi.

Tulai in i lakah Evangelical sinsakna toh kituaklou sinsakna, khangthak teirol-te lunglut theih di zawng a kalsuanna leh thilhihte hong tam hiaihai in, Saptuam sinsaknate ngaihnepna hong uang mahmah hi. Tuat Setan vanzat, saptuam bahsak thei thil ahihman in pilvan huai hi. Khalam pichinna leh theihsiamna chiimtak khangthak te'n hon neih theihna ding uh lametna toh hiai bang program gel ahi.

Hiai hun ah Division nih akipan Sinsaktu leh naupang kigawm 1,100 vel kihel in Evan Upa T. Damkothang in "Contemporary Christian Doctrinal Issues", Evan Upa Lianding Guite in "Contemporary Christian Ethical Issues" leh Rev. K. Kamchinkhup, Director of Missions in "Contemporary Christian Issues" chih thupite pansan in sinsakna nei ua, Child Co-ordinator leh a Teamten phatkhawmna makaih uhi. Hun tawpna ah Rev. Thawndoulian, Director of Ministries in hunkhakna nei hi.

Program hunsung in Division tegel akipan DBCD heutute leh local chih apan Sinsaktute'n a poimoh bangkim ah panla in fel leh kizentak in program zatzoh in om hi.

Pathian in thupina tengteng tangta hen. ■



Mu[♩]ic *Corner*

AW GIN TEHNA (VOCAL RANGE)

Toupa min thupina ding leh A saptuam mite khalam leh salam a khanna ding leh masawanna ding a naktak a ginom leh muanhuaitak a kizang tengteng khovel hondam ding a hongpai i Lal leh Hondampa Jesu Khrist min in itna chibai ka hon buk hi.

Pathian' pina toh kum 2025 mu ding a lametna lianpi i neih lai in, kum hong tung ding ah bangchi'n La leh music toh kisai ah kumthak adi'n i na kisakhol a? i hihtheih khomkhom a Pathian adinga i kizatna ah kalkhat bek suanbeh i sawm hiam?

Toupa makaihna ziakin lasak & music toh kisai ah tuchiangchiang in khantouhna in hon phakna khat om hi-in i thei a, masawanna khat ahi a kipahhuai i sa a, hiai tan hon tunpih i Toupa min phat in thupina teng i pia hi. Naupangte, Tuailaite la leh music ah i lunglut ua, ma i sawn mahmah ua kipahhuai i sa hi. Nu-le-pate'n leng i lunglutpih haihiai ua, khamtheih tellou a music & la siamtheih luat ahihdan i theichiang semsem ua kipahhuai sak in om hi.

Saptuam ah leng la leh music tellou a biakna kikhop theihlough phial in ngaihtuahna i nei ua, tuabang a Pathian hing leh Siangthou Phat leh Biakna i ngaihpoimoh mahmah ziak un manpha i sa mahmah a, khantouhhuai i sa mahmah hi. Kum hong pai zel ding ah, music leh la toh kisai a hing zawsem, siam zawsem a kalkhat bek i suahbeh a, masawanna khat i neihna a hihkhak leh chihna toh la toh kisai a kalsuanbehna ding khat saulou in enkhawm leng i chi hi.

Lapawl (Choir) hi in mimal (solo) lasak hitaleh, eilak a kizang khalou, i zat luat ding uh leh phatna lasa mite'n a loutheilou a i theihngeingei a i phattuampih ding hiai vocal range ahi. Mihing aw neihdan Toupa'n hon piakdan a kibang vek kei, aw sah deuh neipawl, aw pan deuh nei pawl, aw ngat deuh nei pawl, aw heu/thel deuh nei pawl, aw thuum deuh nei pawl bang i om hi. Khenkhat siamtak a aw sangtak a sasiam bang i om a, khenkhat siamtak a thuum deuh a sasiam, aw niam pai deuh pawl leng i om uhi. Sam gelhtu'n "…lauhuaitak leh lamdangpi a bawl.." (Sam 139:14) i hihdan a chiang mahmah hi. Ahihleh, Bangchi bang a la sate ahia lasiam i chihte? chih dotna lianpi suak hi. Hiai apan hong chiang


mahmah tuh, “mihingte Amah thupina ding a siam leh bawl i hi.”(Isai 43:7) Mahni vocal range thei in, huai sang a niam zaw hiam, huai khel a sang zaw hiam in sa kei peuh mahle i lasak hong nuam ding a, thazoh takin kisa thei ding a, ngaihkhia nuam mahmah in lasiam i hong hithei ding hi. Vocal range i theih chiangin, huai pansan in Key/Pitch saknuam hun music-track in la i sa theita ding hi.

Lapawl i siamsemna ding in eimah vocal range chiat i zonkhiak masak poimoh mahmahte lak a khat ahi. Lapawl a Alto sa ding mi ihi hia, ahihlouhleh, soprano sa ding mi? Huchi mahbang in, Bass sa ding mi/Tenor sa ding mi i panna ding mun i theihchian poimoh i sa hi. Tutkhakna munmun a sasuk mai lou deuh in.

- Soprano & Tenor : Aw key sang deuh sa/neite genna ahi.
- Alto & Bass: Aw key niam deuh sa/neite genna ahi.

La sang sa zoute leh aniam lam sa zoute siamdan, mohpuakna leh lapawl a ei panmun chiat ah i poimoh dan kibang vek ahi chih thei in la leh music lam a siam tungtuante’n ana zat ua, agenthupi uh mahni vocal range zonkhiak theihna ding a ana bawl uh hiai anuai a bang ahi. Keyboard tumkawm in na vocal range zongkhia in. Ahihlouhleh, keyboard siamte toh na vocal range zongkhia in.

Vocal Ranges in Relation to the Piano



LAPAWL PART MINTE

Soprano
 Alto
 Tenor
 Bass

AW TEHNA DING

C4 – C6
 G3 – F5
 C3 – C5
 E2 – E4

A niamlam bangtan zou? _____, A sanglam bangtan zou? _____.

Hiai apan in na vocal range hong kithei ding hi. Huaiban ah, Saptuam lapawl ah bang part sa ding chi a buai ngailou a panna ding mun honhilh ding hi.

Toupa’n hon vualzawl hen!





EBC Innsung Thu

MEDICAL CAMP- 2VEINA KALSUANNA REPORT:

Medical Team Health Care Board in Thanlon Division ah khua/saptuam 3- Mualpheng, Khajang & Phaitong ban ah, Singngat Division ah Kaihlamte ah Free Medical Camp November 22-23, 2024 in neih ahi. Thanlon Division ah DS team in hon makaih uh a, kithuahpihna hoihtak hon pia uhi. November 22, 2024 ni Nitak nung in Sinzawl ah ka giaklut uhi. November 23, 2024 in Singngat Division a Kaihlam ah zingan manawh in bialtu Pastor makaihna toh medical camp kinei a, huai zoh in Lamka ah ka hong kikhawn uhi.

Mualpheng khua ah: EBCC Mualpheng ah saptuam inn 30vel om a, saptuam school leng om hi. Huai ah Dialkhai khua apan saptuam mi 40 val hongtel uh a, khosung mi toh sim in milip 170vel hong kiensak uhi. Saptuam in zingan limtak honna bawlsak ban uah kithuahpihna hoihtak honna pia uhi.

Khajang khua ah: EBCC Khajang ah saptuam mi inn 30 vel mah om hi. Pastor quarters mun ah medical camp neih in om a, sawtlou nung in khua in hon mial khum hi. Khosung mi 58 hong kiensak uh a, pitek mit mial khat a inn mun mahmah ah Doctor in va enchian in damdawi leng akithuahpih ding piak in om hi.

Phaitong khua ah: EBCC Phaitong ah nitak nungpi himahleh saptuamte'n kithuahpihna hoihtak honna pia uh a, school compound ah camp neih zom in om hi. Milip 65 hong ki-ensak uh a, nitak 8:00PM vel in kizou thei pan hi. Huai zoh in nekding limtak hon bawlsak uh nekhawm in Sinzawl zuan in ka paisan uhi. Thanlon DS team in hon kiksian uhi. Sinzawl Pastor Quarters ah kinga in Pastorte sungkuan toh Upate'n honna vaidawn uh a, kihahsiang in zan tawldamna hun kizang hi. Azing (23.11.2024) 5:40AM a kipankhia in Kaihlam ka zuan uhi. Mualnuam Pastor Quarters ah singpi dawn in Pastor in hon zui hi.

Kaihlam khua ah: Kaihlam khua zing 9:45AM vel a tung in school naupangte leh saptuamte'n honna vaidawn uhi. Zingan

ne masa in huai zoh in school compound ah kietsakna kipan hi. Saptuam mi hong kiensak 76 pha hi. Nitaklam 1:00PM vel a zou in saptuamte'n thumna toh hon khakhia uhi. Huai apan hong kileh suak vengveng in Lamka 5:40PM vel in ka hong tung uhi.

- **Rev. Nenglian Vualnam**, *Director of Development, EBC*

BIAKIN THAK HONNA LEH LATNA NEI:

Kum 2009 in Evangelical Baptist Convention Church, Khominthang kichi EBCC Vengnuam apan inntuan hi: Pathian pina leh makaihna ziak in taksa leh khalam ah muhtheih in khanna thupitak om hi. Inn 500 bang pha in Biakin leh Sunday School a naupang lam hi in, piching lam hileh kita nawnlou in biakin thak poimohna hong lian mahmah ahihman in Lamka South Division DEC lamkaihna toh EBC Headquarter Dorcas Hall deihsakna ziak in biakin leh Sunday school mun ding a thak hon leisak uhi. Tua hon leisak kia leng hilou in Biakin ding Division toh EBC Headquarters pangkhawm in feet 80 a sau leh 40 a lian hoih mahmah leh kilawm huntawk bawlina ding a poimoh bangbang hon piak ziak un, bawlzoh in om theita a, kipahna lian hi.

Date October 25, 2024 in honna leh latna Rev. Dr. S. Vung Minthang, GS/EBC in nei a, Biakin min ding EBCC Hermon phuah ahi, tunitan in kikhopna leh biakna paitou thei in, EBC Khawmpilian 76na in a pomna leng nei hi. Hiai Biakin honni in veng tuamtuam a i saptuamte'n sum leh pai ban ah, van tuamtuam poimoh mahmahte hon tawi in biakin thak loppihna leh kipahpihna in nong uapna tung uah kipak mahmah ung.

Hiai teng banah, EBC Headquarters in naupang Sunday School ding poimoh mahmah lamna ding in grant hon pia in tu in a nna pat ahita, hiai bang a i saptuam heutute deihsakna ka tan uh thupi sa in Khristian Thukizakna tungtawn in kipahna lungtang tawng apan suak ka hon taklang uhi.

Toupa'n panpih ngen leh poimohte panpih thei jel ding in a vualzawlina toh honpi zel hen.

Sd/- Upa T Langkhogin, *Secreatry, TBUC, EBCC Khominthang* ■

RELIEF VAN HAWMNA

Mission Partnership a i sepkhawmpih Serving In Mission (SIM) heutate apan Manipur buaina ziak a saptuam mi galtaite ading Relief huhna sum Rs. 69,807.00 hon piak uh pansan in Saptuam mi haksa diak khenkhat samkhawm in December 18, 2024 zing in Upa V Ginchinpau, Chairman Relief Sub Committee leh Upa N Tawna, Finance Secretaryte makaih in Gospel Centenary Hall mai ah Blanket leh Bedspread kopkhat chiat piakkhiakna neih in om hi. Haksatna leh buaina lak ah hon thumsaktu leh deihsak a hon huhtu ding hon pia Pathian tung ah kipahtu gen in thupina tengteng i khusak hi.

Thu Tuamtuum

KIPAHTHU GENNA:

Nungak Chingkhannuom d/o Letkhomang Baite leh Veikholhing EBCC B Kaljang Lamka North Division in SBI ah Junior Associates na sem a khaloh lak masak pen Pathian kiang kipahtu genna in TBUC ah hon piakna tung ah kipaklua ka hihman un ka kipahna uh KTZ ah ka hon taklang uhi. Toupan a sepna leh mailam ah makaih in vualzawl zel hen chih ka deihsak uhi.

Sd/- L/Upa Goubiakmang, *Asst. Secretary, TBUC, B Kaljang*

KIPAHTHU GENNA:

Kei Upa M Nangkhanlian stroke a puk, khuak a sisan om lakkiak ngai himahleh EBC Kumsim khawmpi lian 76na zat ding lunggulh mahmah in Khawmpi kiptatma in Lamka kongtung a, khawmpi leng ni khat ni zang man in shillong lam a ki-etkolna ding in kintak a kuankhiak a ngaihziak in tua lam ah ki-enkol ding in ka vakuan a, tun bel ka hoih mahmah ta hi. Damsiang nailou ka hihman in na thumna ua hon thumpih lai ding in ka hon ngen hi. Ka damlouhna toh kisai a hon awlmoh a hon thumsakte, khamuanna thu leh lam tuamtuum a honna kithuahpihte tengteng tung ah kipahtu hiai KTZ tungtawn in ka hon gen hi. Toupa'n na nasep hoihte uh a lehtampi in hon vualzawl leh chih ka thumna ahi.

Ka kipak

- Upa M Nangkhanlian, Suangdoh ■



Ordain Sunna

1. Min: **UPA S. JAMKHANTHANG**
2. Pianni: June 15, 1953
3. Pianna Khua: Khajang, Thanlon Sub-Division
4. Pianthak Hun: January 28, 1974
5. Baptisma tanni: February 14, 1974 (Tuitak)
Baptistu: Pastor S. Thanglian
6. Pa Min: (L) S. Khamkhopau
7. Nu Min: (L) S. Chiinnieng
8. Zi min: S. Vungzamawi
9. Kitenni: February 15, 1978
Kitengsak tu: Pastor S. Thawngkham
10. Gil a gah goutan neihzah: 4, Pasal: 2, Numei: 2
11. Tulel a omna Saptuam: EBCC Zenhang Lamka
12. Tulel a kizatna: TBUC Member
13. Ordain Kum: December 12, 2004
Ordain Petu: Rev. B. Luaichinthang
14. Pahtakna lai san kum: December 10, 2023
15. Toupa kiang a tawldam ni: November 29, 2024
Vui ni: November 29, 2024
16. Vuitu Pastor & Saptuam: Pastor T. Thanggoulian, EBCC
Zenhang Lamka
17. Natna: Pneumonia
18. A tanchin gelhbeh nop: Khajang khua a KTP phutkhetu
(Founder) member ahi – 1975.
1975 – 1977 leh 1980 Khajang Saptuam, Local Committee
member, 1977 – Building Committee member, Ngazam
Tuailai Camp a Tuailai 15 toh vatel uhi. Khajang khua a kipan
Tuithapi khua ah 1996 kum in peplut ua buaina ziakin 1997
in Zenhang Lamka ah pem nawn in a sihni dong in khosa
uhi. October 2023 khatawp lam in khosik in hong damlou hi.
Doctor ki-ensak in test tuamtuum a neih nung un-Pneumonia
ahih dan muhsuah hi a ICU ah 3 vei bang lut hi. Damlouhna
ziak in Upa Pahtakna lai sang zoulou in a Tapa in ama sik in



vasang hi. Hong hoihtou zel chi a a kiomlai in November 25, 2024 in nak haksa sa in-hospital ah kipolut nawn a, ICU ah Doctor ten theihtawp suah in kem mahle uh Toupan hun sata ahi ding a November 29, 2024 (Sintawpni) zingkal dak 6:00 am lakvel in hon tawldam san ta hi.

Toupa Khasiangthou in a nutsiat a inkuan leh Saptuamte khamuan in makaih zel hen aw. ■

1. Min: **UPA Dr. S LIANZATHANG**
2. Pianni: January 10, 1947
3. Pianna Khua: Dialkhai, Thanlon Sub-Division
4. Pianthak Hun: November 13, 1981
5. Pa Min: (L) S Pumkhothang Ngaihte
6. Nu Min: (L) Niangchiin, Vualnam tanu
7. Zi min: Nemzakhawl
8. Kitenni: May 14, 1977
9. Gil a gah goutan neihzah: 3, Pasal: 3
10. Tulel a omna Saptuam: EBCC Hebron
11. Tulel a kizatna: TBUC Member
12. Ordain Kum: 1988
13. Toupa kiang a tawldam ni: November 20, 2024
Vui ni: November 21, 2024
14. Vuitu Pastor & Saptuam: Pastor T Songkhanthang, EBCC Hebron
15. Natna: Stroke
16. A tanchin gelbeh nop: Amah Pathian thu lunglut mahmah mi ahi a, houlimna leh chiamnuih khawng nuamsa mahmah hi. 1981 November a Jesu Khrist Hondampa ding a a saan nung in a hinkhua, houlim utdante hong kikheng vek in Pathian thu a houlim khawng a utlam ahi. Thum mi leng ahi a, niteng in dakkal 1-2 sung Bible Study leh thumna hun zanggige hi. Camp leh counsellor bang in Toupa'n zang manpha mahmah hi. Upa ordination a tan khit nung in Local Division leh Headquater level tanpha ah dinmun poimoh taktak len in Toupa'n zang hi. Saptuam sung kia hilou in organization YPA,



SSPP, BSI, NLYC, GBC leh Civil Officer Pensioner Society chih te ah leng panmun a lenkha hi.

Amah taksa hatlou himahleh a hinkhua a Pathian humbitna lam tampi ah muh theih ding om hi. February 16, 2022 in stoke in hong omguih mawk a damdawi innte ah kikep theih dandan in kikem a hoih lam manoh in hatlou sasa himahleh inn mun ah hihtheihtawp in kikem tou den hi. November 19, 2024 in stoke in hon pha nawn a District Hospital puak tung himahleh damsuaah zoulou in November 20, 2024 in a nna a sep leh amuan Toupa kiang tawldam ta hi.

Toupa Khasiangthou in a nutsiat a inkuan leh Saptuamte khamuan in makaih zel hen aw. ■

1. Min: **UPA G VUNGZAGIN**
2. Pianni: March 01, 1964
3. Pianna Khua: Sialbu, Singngat Sub-Division
4. Pianthak Hun: 1971
5. Baptisma tanni: June 20, 1976
- Baptistu: Pastor T Pauzalang
6. Pa Min: Tualkham Guite
7. Nu Min: Luanniang Neihguk
8. Zi min: Mrs. Dimzaniang
9. Kitenni: December 28, 1988, Kitengsak tu: Pastor Khaikhotuan
10. Gil a gah goutan neihzah: 3, Pasal: 1, Numei: 2
11. Tulel a omna Saptuam: EBCC Tangnuam
12. Tulel a kizatna: TBUC Member
13. Ordain Kum: December 14, 20014
Ordain Petu: Rev Dr. S Vung Minthang
14. Pahtakna lai san kum: Active
15. Toupa kiang a tawldam ni: November 18, 2024
Vui ni: November 18, 2024
16. Vuitu Pastor & Saptuam: Pastor B Thangngaihmung, EBCC Tangnuam
17. A tanchin gelbeh nop: A neu apat biakin limsak mahmah mi ahih dungzui in biakin dak kum 5 vingveng khen hi. Biakna limsak leh Sunday Skul kai limsak mahmah



ahihman in kaitampen hihna 4 vei sangkha hi. Beginner apan Primary tan honour certificate sang den hi. Primary pawl sinsaktu in leng kum 2 bang pangkha hi. Kimawl, Thangkam, mehzon, tengkol sawk, ngabet chihte lunglut mahmah mi ahi. Sialbu a omlai in lawm leh vual hau mahmah in a leader bang in pang hi. Kimawl lunglut mahmah ahihman in Sialbu Youth Club bang phutkhia in cup leng lakpih hi.

Laisimna lam ah Sialbu M.E School ah pawl VI tan zou a, Mission Compound ah pawl VIII-IX sim hi, Pawl X Vimala Raina High School apan in zoukhia hi. Agriculture Office Tuibuang ah grade kum 5 sem a, Manipur Express ah leng reporter masapen in pang hi. EBC School ah leng semkha a Siamsinpawlpai ah leng Magazine Board ah pangkha hi.

Kum 1984 apat a sihni tan kumkhat a vuahzuzah chiamteh den zou mikhat ahi. Thil sut/Chiamtehmi ahihman in Lamka Post in “Scientist Ginpu Guite” chih min pia uhi. Mikhemlou mi ahi. Kum 2000 in Thukhunthak bu kha 2 sung in 3vei simsuak hi. BCD, Missions leh TBUCte ah panmun poimoh taktak a damlai in lenkha hi.

Toupa Khasiangthou in a nutsiat a inkuan leh Saptuamte khamuan in makaih zel hen aw. ■

BCD SINLAI BU LEITHEIH DING

Baptist Children Department Sinlaibu – 2025 a ding a nuai a bang in Convention Book House ah leitheihta hi.

SI No	PAWL	RATE
1	Beginner A – Kum 2 nd (New)	75.00
2	Beginner B – Kum 1na (New)	75.00
3	Primary - Kum 2na (New)	90.00
4	Junior – Kum 2na (New)	90.00
5	Intermediate – Kum 3na	70.00
6	Senior – Kum 2na	75.00
7	Khristian Sinsakmi (R&R 2023)	100.00

EBC KUM THUPI 2025 KHENNENNA

“I LAMPITE ENCHIAN NI”

◆ KAHLATE 3:40 ◆

KHA	THUPI KHENNENNA	THUPI GENCHETNA
JANUARY THEINOUSIKHA	I LAMPI ZUIH ENCHIAN THAKA TOUPA KIANGA KIK NAWNNA Kahlate 3; Jacob 4:1-12; Isai 59:1-8; Isai 55:6-7	Tua i lam zuih leh ah Toupa a lungkim in a kipaak diam chih kiveelchian thak a, Toupa lungkimna lampi a kik nawn dia theitawpsuah ding
FEBRUARY TUNKHA	KI-IIT TUAHNA LAMPI A PAI GINGTU Johan 17:26; Romte 12:9-10; 13:8; Matt 24:9-10; 2 Tim 3:1-5; 1Pet 1:22	Bible in hunnanung ah ki-ittuahna kiam hiaihiadi ding achih tangtung mahleh ei gingtute ki-ittuahna lampi a pai teitei ding, ki-ittuahna aom nadia hahpan a pan teitei ding.
MARCH DOUTAKHA	KINGAIHDAM TUAHNA LAMPI A PAIKHAWM Matt 5:9; 6:12-15; 18:21-35; Eph 4:32; Kol 3:10-14	Pathian in Tapa Jesu tungtawna hon ngaihdam banga mihinpihte ngaihdam; kingaihdamna in gingu hinkhua tawldamsak.
APRIL DOUPIKHA	KIHEPHIH TUAHNA LAMPI A PAI GINGTU Mark 2:1-5; Luke 10:25-37; Nas 16:25-34; Jacob 2:14-17; Matt 25:37-40	Gingtute khat-leh-khat i kihhepihtuah a, i kinek ngaiha, i kinai mahmah chiangin Toupa a lungkim mahmah hi, tua ding mah a hotdam i hi uhi.
MAY ZINGKHA	GINGTUTE I LAM TONNA AH LUNGSIM MUNKHATNA Jn 17:22-23; Nas 2:1-13; 1 Pet 3:8-9; Rom 15:5-7; Fil 2:1-11	Gingtute lungsim munkhata I om chianga Pa'n Jesu khovel ah hon sawl chih Leitung in thei ding; Pentecost ni a mipite' lungsim munkhata a omkhawm uleh Kha hong tung hi.
JUNE GAMKHA	KIPANPIH TUAHNA LAMPI A PAI GINGTUTE Nas 2:44-47; 9:36-43; Gal 6:2; Luke 19:1-10; Eph 2:10; 2 Thess 3:13	Nna hoithe sem dinga hotdam i hihna sepsuah zomzlena tungtawn a Jesu lahkhiak ei gingu te mawhpauk gige ahi. Huaiziakin, nna hoihsep chintaklough ding ahi.
JULY TANGSIKHA	KINIAMKHIKHA LAMPI A PAI GIGE GINGTU HIH DING Pau 22:4; Luke 14:7-11; 1Pet 5:5-6; Matt 5:5; 8:5-13; Isai 66:2; Jac 4:10	Tui iniamna lamlam-a aluan bangin, kingainiam mi tung ah Toupa Kha in nnasem zaw in Leigou luah in, mite deihsakna nakpi'n dong zaw uhi.
AUGUST KHODOUKHA	KITUAHNA LAMPI A PAI NAM Nas 17:26-27; Joshua 7:10-15; Neh 5:1-13; 2 Sam 5:1-5; Sam 13:3; Pau 6:16-19; 14:34; 17:1; 18:19; 29:2, 12; Matt 12:25; Gal 5:15; Jacob 3:16	Nam sung kituahna dingin Toupa'n mimal chih tung ah tanvou hon guan hi; tua i tanvou chiat pen michih in i zonkhiak ding a thupi ahi. Toupa' lampi zonga, a deihdan lampi zuihna tungtawn in Toupa'n Nam sung ah kituahna chidamna hon tun ding hi.
SEPTEMBER TANGKHA	GINGTU HINKHUA AH HEUTU THU MANG Kol 3:18- 4:1; Eph 5:22-25; 6:1-9; Rom 13:1-7; Heb 13:17; 2 Kum 5:11-14; Tita 3:1-8	Heutu dia a chitman, ei lungsim toh a paidan a kituah man leh ei punna ding lel a thuman ding hilou in, Toupa Jesu ziaka thuman ding ahi zaw, tua hileh vuaizawlina ei a ahi ding.
OCTOBER PHALKHA	PATHIAN' BATPIH-A BAWL MIDANGTE ZAHTAKNA PIK NGEINGEI DING Gen 1:26-27; Pau 14:31; 17:5; Rom 14:1-12; 2Pet 3:3; Jacob 3:13-18	Bible in Pathian melsun a kibawlina simmawh leh a siamtu Pathian simmawh na hi a hon chi hi. Tua kia ahi kei, vaihawmna maituah ding i hi a hon chih behlai h. Huaiziakin kisimmawh louh himhim ding ahi.
NOVEMBER NOUKHA	TOUPA THU-A GINGTUTE' KITHUMANTUAHNA Gen 2:16-17; 3:6; Josh 1:6-18; Esther 4:8, 15-17; Jac 1:19-27; Pau 29:1; 1 Tim 5:20; 2 Tim 4:3-5	Eden huan ah Adam in Toupa thu hilou a azi thu aman ziaka mihing tangtung kikkek hithet ahihna theisiam a, Toupa thu 'Bible' toh kituak ahih peuh leh kithumantuah teitei tup a, delh a delh ding ahi.
DECEMBER KAUKHA	GINGTUTE' KITUNDINGTUAH NGEINGEI DING Matt 13:41; 18:6-9; Luke 6:30,38; 12:32-34; 1 Thess 5:11-15; Heb 13:16; Rom 14:13; Jac 1:27;	Social media, tut-houlimnate, hindan-khosakdan, khaalzin-gamvakra khempeuh ah Toupa'n i mihinpih a tatsate a lamtouhna dia, Toupa vanzat manpha i hih chiat ding; mi lainiamtu leh kaibahtu hilou teitei dia panlak ding ahi.



JANUARY 2025

Kipahthu Genna leh THUMNA DINGTE

1 NILAINI: A hoihna ziak a kumthak mel honmusak i biak Pathian kiang kipahthu gen ni. Kumlui a i hihkhelhte ngaihdam ngen in, tukum manpha leh Ama deihna banga i zat theihna ding in damsung nite simsiamna ngen in thum ni.

2 NINGANI: Pathian in i saptuam a heutu leh makai thak hon piakte, General Secretary Rev K Kamchinkhup, Director of Ministries Rev M Zalian Guite, Director of Missions Rev Thawndoulian, Director of Development Rev Nenglian Vualnam te ziak in kipahthu gen ni. Amaute' Pathian ompihna leh makaihna ngetsak in thumpih ni.

3 SINTAWPNI: Tuni a kipan 5 sungteng BCD EBCC Moria in Hotdamna Chialpina nei ding ua, Evan Lianding Guite thugentu in pang ding, chialpina lohching leh gahsuaah ahihna ding in thum ni.

4 KIGINNI: EBC Kumsim Khawmpilian 76na lohching leh manphatak a i zatkhittak man in kipahthu gen ni. Nasep ding leh mohpuakna kikhekte hoihtak a sepkhiak a hihtheihna ding in Toupa makaihna ngen in thum ni.

5 NIPINI: Tukum a semtute kisuankualna in hon sukkhak

semtute Toupa makaihna leh ompihna toh kithalawpna toh a munte uh damtak a atun ua gahsuahtak a a sep theihna ding un thumpih ni.

6 SEPPATNI: Tukum in i gam leh nam leh kuapeuh in eimah lampi zuihte enpha thak a Toupa deihna leh lam-et bang a kalsuan a hinkhua zang a a lungtunna leh kipahna sukha ding a kuapeuh Toupa lam a kinknawn ding in thum ni.

7 SEPNAWNNI: Convention Book House a nasepna paihoih tou zel huai a semtu Manager leh semtute leh press lam a semtute Pathian kithuahpihna leh makaihna toh hoihtak a hon sep zom theihna ding in thumpih ni.

8 NILAINI: Tuni apan in EBC Saptuam office teng kihong nawnta. Pathian kiang a kipahthu gen kawm in, Office vai a sepding om bangbang a hunhun a sepkhiak a honghieh theihna ding in thum ni. EBC Headquarters level a sub committee tuamtuam kibawltan Pathian leh Saptuam deihna banga a mohpuakna chiat uh hon sepkhiak theihna ding un Tunglam pilna ngen in thumpih ni.

9 NINGANI: Lametnamun (LRRC) a nasepna paihoih thei zel

kipahthu genni. Huai ah salam leh khalam a suahtak ut a om inmate te leh amautieenkol semtute Pathian kha nasepna ngen in thumpih ni.

10 SINTAWPNI: Tuni a kipan in i saptuam a schoolte lutnawn ta ding uhi, i schoolte tungtawn a siamsinna hoihtak leh lamzangtaka a patieihna ding in, sintute leh sinsaktute thumpih ni.

11 KIGINNI: Saptuam in tulel a school toh kithuah Hostel 3 leh school toh kithuahlou semtute tate omna hostel 1 (Beth-Haran) i nei uhi. Hiai hostelte ah nauapang 116 omlel uhi. Amaute enkoltu warden leh naupangte Pathian ompihna leh makaihna ngen in thumpih ni.

12 NIPINI: Mun tuamtuum a amau hihna bangbang toh Pathian nasem bang a kingai a NDPN tungtawn a kipia mite ziak in kipahtu gen in, amaute gahsuahtak leh Pathian vanzat manpha a sua theihna ding un thumpih ni. Mission fieldte a missionary munthak leh gamthak phuding a lutthak dingte a ding in thum ni. A sepna mun ua mite toh kichimattak a honsep theihna ding un thumpih ni.

13 SEPPATNI: Zingchiang in EBCC Zenhang Lamka in BCD Sinsaktu orientation nei ding hiai hun in M Rev Ginminthang, Child Co-ordinator in sinsak ding, kisinsakna manpha ahina ding in thum ni.

14 SEPNAWNNI: Tuni a kipan 24 sung Hagai Leadership Experience Conference, Malaysia ah om ding a Rev

Nenglian Vualnam, Evan Damkhotang, Evan Lianding Guite, Pastor B Chinkhengoupau leh Rev G Thangsanglian te va kihel ding thumpih ni.

15 NILAINI: Dorca pawl malakna a puankhui zilsate leh zillelte ziak a kipahtu gen in, hiai nasepna in masawn a, mite adia kingakna tham a honghihna ding in Toupa vualzawlina ngen in thum ni.

16 NINGANI: DORCED nuai a naupang chawm a omte zia kin kipahtu gen ni. Amauten amaban chiat uh lamzangtak a hon sutzom theihna ding un Pathian pina ngen in thumpih ni.

17 SINTAWPNI: Tuni leh zingchiang in EBCC Singngat Division sung a EBCC a Naupang Nipi Skul a sinsaktute Orientation nei ding ua Rev M Ginminthang Child Co-ordinator in sinsak ding thumpih ni.

18 KIGINNI: Olive Retreat Center Lamzang a Camp Site i neih uh, Camp leh thumna mun zang ding om tou gige ahihman in kuapeuh in khalam a kisekna manphatak hong hih semsem na ding in thum ni.

19 NIPINI: Tuni Naupang leh Piching lamte Nipi Skul kipatni ahiehtoh kiton in kuapeuh in ngai poimoh a kai siausiau leh kumtawn a kaisuak theih ding in thumni. Naupang leh piching lam a sinsaktu dingte thumpih ni.

20 SEPPATNI: I saptuam sunga seem grade - IV te ziak a kipahtu gen in, amaute Pathian leh heutute deihna banga a mohpuakna uh hon sepkiak zel theihna ding un thumpih ni.

21 SEPNAWNNI: Local, Division, Field Office leh Headquarters a sum saite ziak a kipahtu gen in, amauten Pathian muanhuaina koppih a hon saizom zel theihna ding un thumpih ni.

22 NILAINI: Division leh Headquarters a clerical staff te leh Local Saptuam enkaitu Pastor leh Ordain Upate ziak a kipahtu gen in, a mohpuaknate uh gin-om leh chihtak suah a hon sepzom zel theihna ding un leh belamte a neitu deihna bang a hon chinzel theihna ding un thumna ah phawk ni.

23 NINGANI: Toup'a'n a kul leh poimohna munte a Tangthupha gendia honpiak Evangelist te; N Thangsuanpau, Upa T Damkhotang leh Upa Lianding Guite te ziaka kipahtu gen in, Saptuamte lak a Kha khanlohna tuntu hiding in Pathian Kha ompihna leh makaihna ngen in thumpih ni.

24 SINTAWPNI: NDPN vai a Khominthang ah Laisimna Inn i neih uah naupang bangzah hiam om, Delhi lam a leng exam ding a kisakhol in laisim mi bangzah hiam leng om salam chidam leh hoihtak a kisakkholhna a neihna ding un thumpih ni.

25 KIGINNI: Tuni leh zingchiang in EBCC Guwahati mun ah EBCC Guwahati, Shillong, Dimapur, Kohima, Diphu, Manja akipan naupang sinsaktute paikhawm in Orientation nei ding ua Rev M Ginminthang Child Co-ordinator in sinsak ding, a tel ding mite leh Sinsaktu ding thumpih ni.

26 NIPINI: Dorcas Hall pansan a sem Co-ordinatore Promoter, leh Choir conductor ziak a kipahtu gen in, maban a Pathian ompihna leh makaihna toh a mohpuakna chiat uh lungtunhuai tak a hon sepkhiak theihna ding un Pathian pina ngen in thumpih ni.

27 SEPPATNI: Division chih a divisional superintendentte ziak a kipahtu gen in, amauten Pathian deihna banga division chih hon makaih zel theihna ding un thumna ah phawk ni.

28 SEPNAWNNI: Grace Bible College tungtawn a Pathian vualzawlina i tante ziak a kipahtu gen in, maban lamzangtak a hongpaizom zel theihna ding in, Principal, Staffte, studentte leh BOG memberte thumna ah phawk ni.

29 NILAINI: Ebenezer Academy tungtawn a Pathian vualzawlina i tante ziak in kipahtu gen ni. Maban a gahsuhzawsem leh lohchingsem hong hihna ding in Principal, staffte, studentte leh Board Memberte thumna in phawk ni.

30 NINGANI: Pathian in Khovel mun tuamtuam 15 ah Missions nasepna ding kong hon sak a i om ziak in kipahtu gen ni, Tu kum thak a kuan khe ding a kisa lelte leng hong lamzan theihna ding un thumpih ni.

31 SINTAWPNI: January khatawp tan honpi i biak Pathian kiang kipahtu gen in, tukha sung a sepkhelh i neihte ah A ngaihdamna ngen ni. ■



EVANGELICAL BAPTIST CONVENTION

DORCAS HALL, NEW LAMKA 795006, MANIPUR

EBC KUM THUPI 2025

I Lampite Enchian Ni

→ KAHLATE 3:40 →

SAPTUAM NIPOIMOHTE 2025

1	Kum Thak Ni	January 1	Nilaini
2	Nipi Skul Pat Ni	January 19	Nipini
3	Republic Day 🌟	January 26	Nipini
4	Zomi Namni 🌟	February 20	Ningani
5	Palm Sunday	April 13	Nipini
6	Good Friday 🌟	April 18	Sintawpni
7	Easter Sunday	April 20	Nipini
8	Missionary Day 🌟	May 7	Nilaini
9	Nute' Nipini & Dorcas Day	May 11	Nipini
10	Pentecost Day	June 8	Nipini
11	Pate' Nipini	June 15	Nipini
12	Naupangte' Nipini	June 22	Nipini
13	Kipahthu Genna/Haithak/Buhthak	Tualsung saptuam seh ding	
14	GBC Sunday	July 6	Nipini
15	Independence Day 🌟	August 15	Sintawpni
16	Gandhi Jayanti 🌟	October 2	Ningani
17	Division/Field Khawmpi	October 5 tan a zoh ding	
18	Tuailaite' Nipini	October 19	Nipini
19	Nipi Skul Kumtawp Exam	November 16	Nipini
20	Kumsim Khawmpi 77th na	December 4 - 7	
21	Khristmas Ni	December 25	Ningani

- (1) 🌟 Hiai nite a Office kikhak/suty ding ahi.
 (2) Indian Baptist Women Union' Thumna Ni August 15 leh BWA Numeite' Thumna Ni November 3 Dorkate' phasak dan a zat ahi ding. Hiai ni a thohlawmte IBWU/BWA a khaksawn ding in Hqrts a piaklut ding ahi.
 (3) GBC' Sunday thohlawm Headquarters tawnlou a GBC a thot ding ahi.

CEC SITTING 2025	329	August 20/Wednesday
326	February 12/Wednesday	330 October 15/Wednesday
327	April 9/Wednesday	331 November 5/Wednesday
328	June 4/Wednesday	332 December 8/Monday

BOOK POST

Postal Regd. No. MNP 07 | Regd. No. 22344/70

If undelivered, please return to

The Editor,
CHRISTIAN THUKIZAKNA
P.O. Box-6, Dorcas Hall,
New Lamka-795006, Manipur, India

KUMTHAK 2025



*“Kumthak 2025 Pathian hon
ompihna kum hong hi henla,
mahni lampi zuih ki-enchian a
Toupa toh tonkhawmna kum hong hiben”.*

- Editorial Board

Edited & Published by Rev. Dr. S. Vung Minthang for the Evangelical Baptist Convention
Designed and Printed at Convention Book House, Dorcas Hall Campus, New Lamka - 795006